



2025-p kingorna sineriak sinerlugu imaatigut ilaasunik angallassinissamut periarfissaasinnaasut pillugit nassuiaat (Arctic Umiaq Line A/S)

- UPA 2024



Imarisaa

Siulequt	3
Aallaqqaasiut	4
Tunuliaqutaq	4
Nassuiaatip killiliussaa	5
<i>Siuariartornissamut Ineriartornissamullu misissueqqissaarneq</i>	5
<i>Atuarnissamut ilitsersuut</i>	6
Arctic Umiaq Line A/S	6
<i>Sinersortaat Sarfaq Ittuk</i>	7
<i>Arctic Umiaq Line A/S-mut angalanissamut pilersaarutit</i>	7
Angallasseriaatsip massakut aqqissuussaana	9
<i>Mittarfiit, qulimiguulinnullu mittarfiit</i>	9
<i>Mittarfiit nutaat</i>	9
<i>Umiarsualiveqarnermut suliaasaqarfik</i>	10
<i>Umiarsualiveqarnermik aqqissuusseqqinnermut pilersaarut</i>	10
Kiffartuussinissamik isumaqatigiissutit	11
<i>Angallaviit kiffartuussinissamik isumaqatigiissutitigut tapiissuteqarfiusut</i>	11
<i>Niuernermik tunngaveqarlutik timmisartuussinermi angallaviit</i>	13
<i>Arctic Umiaq Line A/S-imik kiffartuussinissamik isumaqatigiissuteqarneq</i>	13
<i>Arctic Umiaq Line A/S-ip kiffartuussinissamik isumaqatigiissuteqariaatsimut oqaaseqaatai</i> . 14	
Arctic Umiaq Line A/S-ip pilersaarutaannik naliliineq	15
<i>Aningaasaliiffigineqarnissamut pisariaqartitsineq</i>	15
<i>Takornarialerineq, siunissamilu sineriak sinerlugu imaatigut angallassinissaq</i>	19
<i>Aningaasatigut massakut sinaakkutaasut allangornissaannik pisariaqartitsineq</i>	21
Inerniliineq	22
Ilannussat	25

Siulequt

Ilaasunik angallassinerep angalanermik pisariinnerulersitsinermigut, aningaasaqarnikkut ineriartortitsinermut tapersiinermigut, nunamilu ataqatigiinnermut nukittorsaanermigut aalajangiisumik inissisimavoq.

Inoqarfinni anginerusuni, mikinerusuniluunniit najugaqarneq apeqqutaatinnagu, kikkut tamat nunaminni angalasinnaanissaat pingaaruteqarpoq.

Imaatigut aqqudit qaninnerulernissatsinnut periarfissimatigut, ungasissutsillu akimorlugit attaveqartitsimmata, Kalaallit Nunaata oqaluttuassartaani piuneranilu qitiusumik inissisimapput.

Angallassinermi periarfissap taassumap iluani atugassarititaasut misissussallugit, atorluassallugillu aalajangiisuuvoq. Ilutigisaanik innuttaasut nunaminni qanoq pitsaanerpaamik angalasinnaanerisa misissoqqissaarneqarnerani Kalaallit Nunaata mittarfinnik, silaannakkullu angallassinermik ineriartortitsinera ilaatissallugu soorunalimi pingaaruteqarpoq.

Siullertut nunami innuttaasut angallanneqarnissaat qulakkiissavarput, ilutigisaanillu innuttaasunut iluaqutaasussaatiillugu avataanit tikeraartut aningaasarsiorfigineqarsinnaanerata atorluarlutigu.

Neriuppunga nassuiaat manna tunngavilimmik oqallinnissamat, ilaasunillu angallasseriaasitta ineriartortittuarneranut pitsaasumik sunniutissap suussusersineqarnissaanut tapersiinnaassasoq.

Atuarluarina!

Erik Jensen



Aallaqqaasiut

2025-p kingorna sineriak sinerlugu ilaasunik angallassinissamut periarfissaasinnaasunut, nassuiaat manna tunngassuteqarpoq. Sineriak sinerlugu ilaasunik angallassineq nassuiaammi ukkatarineqassaaq.

Nassuiaatip siunertaa, aalajangiiffigisassatut siunnersuummi Inatsisartut akuersissutigisaanni allassimavoq:

*"2025 nallertinnagu ilaasunik angallassinissaq pillugu Naalakkersuisut pilersaarusoqquneqarnissaannik Inatsisartut aalajangiiffigisassaattut siunnersuut. Angallasseriaatsimut tamakkiisumut atatillugu periarfissani assigiinngitsuni missingersuutit aningaasaqarnikkullu kinguneqaataasussat pilersaarummi nassuiaatigineqassapput, inoqarfiillu amerlanerit tikinneqarsinnaanissaat ilanngullugu suliaqartoqarsimanissaa ilanngunneqassalluni. Pilersaarut kingusinnerpaamik UKA2023-mi Inatsisartunut saqqummiunneqassaaq."*¹

Inatsisartut 2022-mi ukiakkut ataatsimiinnerini, aalajangiiffigisassatut siunnersuut immikkoortoq 56-itut akuersissutigineqarpoq. Nassuiaat kinguaattoornikummat, Inatsisartut 2024-mi upernaakkut ataatsimiinnerini aatsaat saqqummiunneqarsinnaavoq.

Tunuliaqutaq

Aalajangiiffigisassatut siunnersuut siulianiittoq kiisalu Sanaartornermut Ataatsimiititaliap isumaliutissiissutaa tunuliaqutaralugit nassuiaat manna suliarineqarpoq. Isumaliutissiissummi ima allassimasoqarpoq:

"Taamaammat siunissami ilaasunik angallassineq pilersaarusiortugu suliaqarnermi aammattaaq aningaasanut inatsimmi killiliussat qanoq iliorluni allanngortinneqarsinnaanissaat isiginiarneqassasut ataatsimiititaliamit inassutigineqassaaq.

Tamatamani ataatsimiititaliamit naqissuserneqassaaq maannakkut angallannissamut pilersaarutininik umiarsuaq nutaaq kisimi pineqanngimmat. Umiarsuarli ilaasortaataq ullutsinnut tulluutissasoq, sukkanerussasoq, atortorinnerussasoq, Nanortalimmukarsinnaasoq, umiarsualivinnik amerlanernut tulassinnaasoq piffissamilu imaq sikusimatinnagu Upernavimmukarsinnaassasoq piumaneqarmat.

*Tamatamani sinerissamut tamarmut, innuttaasunut takornariaqarnermullu iluaqutaanissaa qulakkeerniarlugu."*²

Taassumap saniatigut Sanaartornermut Ataatsimiititaliap oqaatigaa, sineriak sinerlugu inoqarfiit assigiinngitsut imaatigut tikinneqartarnerat arlaleriarluni politikikkut eqqartorneqartarsimasoq. Matumani § 37 naapertorlugu apeqqutit 86/2018, 137/2021, 159/2021, 68/2021 aamma 97/2022 ilanngullugit. Taakkunanani Naalakkersuisunit akissutigineqarsimavoq, aningaasanut inatsimmi oqaasertaliussani sinaakkutitut aalajangersakkat kiisalu ataatsimoorussamik angalanissamut pilersaarut patsisaallutik,

¹ Inatsisartut, UKA2022, pkt. 56, siullermeerinerimut atatillugu Naalakkersuisut akissutaat, allannguutissatullu siunnersuut.

https://ina.gl/media/rnmp0b3l/pkt56_em2022_bf33_udsiftning_af_kystpassagerskib_sn_1beh_da.pdf / grl.
https://ina.gl/media/ofld32sm/pkt56_em2022_bf33_udsiftning_af_kystpassagerskib_sn_1beh_kal.pdf

² Inatsisartut, UKA2022, imm. 56, Sanaartornermut Ataatsimiititaliap isumaliutissiissutaa.

https://ina.gl/media/rjxkeuea/pkt56_em2022_kystpassagerskib_bf_bet_2beh_da.pdf / grl.
https://ina.gl/media/obqhdjllh/pkt56_em2022_kystpassagerskib_bf_bet_2beh_kal.pdf

umiarsualiviit amerlanerusut tikinneqarsinnaasimangitsut. Taamaattumik ataatsimiititaliap inassutigaa, siunissami ilaasunik angallassineq pilersaaruseriorlugu suliaqarnermi aammattaaq Aningaasanut Inatsimmi killiliussat qanoq iliorluni allangortinneqarsinnaanissaat isiginiarneqassasut.

Arctic Umiaq Line A/S-imit isummersuutit nassuiaammi matumani ukkatarineqarnerupput. Tulliuttumi periarfissaasinnaasut tallimat Arctic Umiaq Line A/S-ip saqqummiuppai:

1. Arctic Umiaq Line A/S-imik atorunnaarsitsineq.
2. Arctic Umiaq Line A/S-imik allanguutitaqanngitsumik ingerlatsineq.
3. Arctic Umiaq Line A/S-imik 1:1-imik nutaanngorsaaneq.
4. Arctic Umiaq Line A/S-imik ineriartortitsineq, nutarsaanerlu.
5. Arctic Umiaq Line A/S-ip Ineriartortinneqartinnagu umiarsuarmik piusumik sivisuumik attartorneq.

Kiffartuussinermi, ingerlatsinermilu assigiinngitsut isumaliutiginerisigut, periarfissaasinnaasut taakkua tallimat toqqarneqarput, Inatsisartullu periarfissatut kissaatigisaannut naapertuullutik. Imaatigut ilaasunik angallassinermi siunissami periarfissanik, Kitaatalu sineriaa avannaanit kujataanut imaatigut qanoq atassuserneqarnissaa pillugit Inatsisartunut ilaasortat oqallinnissaannut tunngavissinneqarnissaat, periarfissani siunertaavoq.

Nassuiaatip killiliussaa

Nunap annersaani ilaasunik angallassinissaaq pillugu 2030-p naaneranut attuutussanik Air Greenland, Norland Air aamma Diskoline kiffartuussinissamik isumaqatigiissusiorfineqarnikuupput.

Air Greenlandip ilaasunik angallassinera imaatigut imaluunniit kiffartuussinissamik isumaqatigiissuteqarfiusumi ilaasunik angallassinermut sunniuneqartillugu, nassuiaammi uani taamaallaat ilanngunneqassaaq. Mittarfiit nutaat ammareernerisigut niuernerimik tunngaveqarlutik angallassiviit nunamik qanoq atassusiinissaat pillugit, Air Greenlandip nammineerluni pilersaaruteqarnera tamatumani patsisaavoq. Taamaattumik angallasseriaaseq taanna misissuinerimi matumani ersarinnerusumik sammineqanngilaq, Kitaatalu sineriaa avannaanit kujataanut imaatigut qanoq atassuserneqarsinnaassanersoq ukkatarineqassalluni.

Sineriak sinerlugu imaatigut ilaasunik angallassineq massakkut umiarsuaateqarfinit allanit isumagineqanngilaq. Taamaattumik Arctic Umiaq Linep, Ineqarnermut Attaveqaasersuutinullu Naalackersuisoqarfiup kaammattuineratigut siunissami sineriak sinerlugu ilaasunik angallassinissamut tallimanik periarfissiortup, ilaasunik angallassinera nassuiaammi taamaallaat ukkatarineqarpoq. Sineriak sinerlugu ilaasunik angallassineq pillugu Inatsisartut siunissami eqqartuinissaannut periarfissat taakkua, ilanngussaaq 3-tut ilanngunneqartut, tunuliaqutsiisinnaassapput.

Inatsisartut aalajangiinissaannut tunngavissap ersarissarneqarnissaa siunertaralugu, periarfissani taakkunani tallimaasuni iluaqutissat, ajoqutissallu nassuiaammi matumani nalilerneqassapput. Missingersuutini aningaasaqarnermut kingunissat Arctic Umiaq Line A/S-imit naatsorsorneqartut, periarfissani taakkunani tallimaasuni ilanngunneqarput.

Suariartornissamut Ineriartornissamullu misissueqqissaarneq

Suariartornissamut Ineriartornissamullu misissueqqissaarnerup suliarineqarnera Naalackersuisut aallartitippaat. Suariartornissamut Ineriartornissamullu misissueqqissaarnermik suliaqarneq, Aningaasanut Inatsimmi *konto pingaarneq 87.11.09 Assartuussineq pillugu Isumalioqatigiissitaq – misissueqqaarnerit* aallaavigalugu aallartinneqarpoq. Pilersaarummut aqqissuussaaneq aqutsisoqatigiinni, suleqatigiinnilu tunngaveqartoq pilersinneqarpoq.

Siunissami angallassinissaq, inuiaqatigiillu ineriartortinneqarnissaat pillugit aalajangiinissami tunngavissaq annertunerulersikkumallugu kisitsisitigut paasissutissanik katersinissaq, kisitsisitigullu paasissutissanik avitsinissaq Siuariartornissamut Ineriartornissamullu misissueqqissaarnerup siunertaraa. Inatsisartut siunissami eqqartuinissaannut naleqqussinnaatillugu, Siuariartornissamut Ineriartornissamullu misissueqqissaarnissaq nassuiaammi matumani innersuussutigineqartassaaq.

Periarfissat ataasiakkaat sunniutissaannik takussutissiisinnaasumik, nassuiaat angallannermut ilusiliaqanngilaq. Periarfissat ataasiakkaat allanngortinneqarsinnaallutik, ilaasunillu angallasserup sinneranut sunniutissat misissorneqarsinnaallutik angallannermut annertuumik ilusiliaqaralaruni iluaqutaassagalarpoq. Kisitsisitigut paasissutissat amerlanerusut katersorneqarsimalereerlutillu misissorneqareerpata, Siuariartornissamut Ineriartornissamullu misissueqqissaarnerup ataani pilersaarummut aaqqissuussaaneq aqutigalugu angallannermut ilusiliaq suliarineqarsinnaassasooq naatsorsuutigineqarpoq.

Atuarnissamut illitersuut

Arctic Umiaq Line A/S, sinersortaallu Sarfaq Ittuk pillugit tunuliaqutaasunik paasissutissiinarluni, taakkua nassuiaammi aallarniutaasumik nassuiaatigineqassapput. Taassumap kingorna pingaartumik umiarsualiviit sineriak sinerlugu ilaasunik angallassinermi tunngaviumsumik tunngaviummata, taakkua ukkataralugit angallasseriaatsip aaqqissuussaaneq tamarmiisoq nassuiaatigineqassaaq.

Taassumap kingorna kiffartuussinissamik isumaqatigiissutit nunami angallasseriaatsip aaqqissuussaaneq ilusilersuisuusut, taakkualu sineriak sinerlugu ilaasunik angallassinermut sunniutaat saqqummiunneqassapput. Inaarutaasumik Arctic Umiaq Linep periarfissiisutai tallimaasut eqqartorneqarlutillu saqqummiunneqassapput.

Arctic Umiaq Line A/S

Arctic Umiaq Line A/S-ip ileqqoreqqusani malillugit umiarsuaateqarfimmik, assartuussinermillu ingerlatsinissaminik siunertaqarpoq.

Arctic Umiaq Line A/S 2016-imi juulip aallaqqaataaniilli 100 %-imik Royal Arctic Line A/S-imit, 100 %-imik Namminersorlutik Oqartussanit pigineqartumit, pigineqarpoq.

Arctic Umiaq Line A/S-ip paasissutissiissutigaa, ukiumut 21.000-it aamma 25.000-it akornanni, taakkunannga 4.000-it sinnerlugit takornarissanik (sumiuunersut paasissutissiissutigineqanngilaq) ilaasortaqartarlutik. Arctic Umiaq Linep paasissutissiissutigaa, takornarissanit sinersortaammut ilaallutik angalaqatigiinnit marluusunit isertittakkatik annertuumik amerleriarsimasut. Visit Greenland naapertorlugu takornarissat 70.000-init amerlanerupput, taamaattumillu Arctic Umiaq Line A/S isertitaqarnerunissaminut periarfissaqarluni. Unnuiffiusinnaasut assigiinngitsunik akillit assigiinngillat, takornarissallu ini akisunerullunilu iluarnerusooq toqqakkajuttarmassuk, tamanna ilaasumut ataatsimut naatsorsorlugu isertitaq annertunerusarluni. Akigititami sumiuuneq apeqqutaaneq ajorpoq.

1990-ikkunni umiarsuit pingasut angalatinneqarmata, Arctic Umiaq Line 60.000-it sinnerlugit angallassisarpoq. Ataasiinnarmik umiarsuaqalernerimi angalasut 60.000-init 30.000-inut affaannangorlutik ikileriarput. Arctic Umiaq Linep paasissutissiissutigaa, angallanneqartartut ukiorpaaluit 20.000-init ikinnerusimasut³.

³ Air Greenlandikkut angalasartut, ukiunut tusindilikkuutaanut nutaanut ikaarsaarnerup kingorna amerleriangaatsiarsimanerinit tamanna patsisaassanganneqarpoq, tak. Assartuussineq pillugu isumalioqatigiissitap isumaliutissiissutaani qupp. 38-mi ilusiliaq 2.2.3.

Sinersortaat Sarfaq Ittuk

Arctic Umiaq Line A/S ataatsimik umiarsuaateqarpoq, Sarfaq Ittuk. Umiarsuaq 1992-imi sananeqarpoq, kingornalu 2000-imi nutarterneqarluni. Umiarsuaq 72,8 meterinik takitigaaq, 2118 bruttotonnage-nik angissusilik, 163 tonsinillu assartuisinnaalluni. Sarfaq Ittuk Danmarkimi aamma Dansk Internationalt Skibsregisterimi nalunaarsorsimavoq, DIS-Ordningimullu ilaalluni ⁴ (tamanna pillugu ataani ersarinnerusumik paasisaqarit).

Sarfaq Ittuk unnuisunut 230+-inut inissaqarpoq. Umiarsuarmi inuttat 22+-iupput. Sarfaq Ittummi inuttat DIS-ordningi malillugu akissarsiaqartinneqarput. Inuttat akissarsiaat umiarsuaateqarfiup aningaasartuutaasa annersaraat, taakkualu orsussamut, aserfallatsaaliuinerullu aningaasartuutinit amerlanerullutik.

DIS-ordningimit allannguisoqaruni, Sarfaq Ittummi inuttat akissarsiaat qaffassapput. Tamanna qularnanngitsumik billetsinut 25%-it missaannik akitsuisitsissaaq. Taamaattumik DIS-ordningi billetsinut akikitsumiisitseqataavoq.

Umiarsuaq saaffiginnitarfeqarpoq, imigassanillu aalakoornartortalinnik sassaalliisoqarsinnaalluni 90-inut inissalimmik caféqarluni. Umiarsuami igalaarsualimmik isersimaartarfeqarpoq. Taassumap saniatigut inimik saqqummiiveqarpoq, pisiniafeqarpoq, ammaannaavissunillu kioskaufiqararluni. Angalasut Wi-Fi-eqarnissaminut pisisnaapput. Umiarsuaq kuuffissuaqarpoq, innaallagiaqarpoq, imeqarpoq, kiassagaavoq, soorlutaaq eqqagassalerisartut. Umiarsuaq tamakkerlugu ullut tamaasa eqqarneqartarpoq. Umiarsuarmi nerisassanik, imeruersaatinillu sassaalliinissamut, allakkerinissamut, mikisunillu poortugalerinissamut periarfissaqarpoq. Krani 5 tonsimik kivitsisinnaasoq atorlugu umiarsuaq nassiussalerillunilu nassatassalerisarpog. Umiarsuaq ilaasunut umiatsiaqarpoq, taannalu inoqarfinnut mikinerusunut Sarfaq Ittuup taliffigisinnaanngisaannut atorneqartarluni.

Arctic Umiaq Line A/S-mut angalanissamut pilersaarutit

Sarfaq Ittuup angalanissamut pilersaarutaa ukiumut, aasamullu immikkoortitaavoq. Angalanissamut pilersaarutit allanngortinneqarnissaanik siunnersuuteqakkajuttoqartarpoq. Politikerit, tusagassiortut imaluunniit innuttaasut siunnersuuteqartuusinnaasarpup. Angalanissamut pilersaarummi allannguutissatut periarfissat misissorneqartarlutik, Naalakkersuisoqarfiup Arctic Umiaq Line A/S ataavartumik attaveqarfisarpaa.

Kujataa Avannaanut atanerulersillugu, Arctic Umiaq Line A/S juunip aallaqqaataanit, oktobarip 19-iata tungaanut angalanissamut nutaamik pilersaarusiornikuuvoq. 2024-mut angalanissamut pilersaarut ilanngussaq 4-tut ilanngunneqarpoq.

Ukiukkut sikuuneranik misilittakkat apeqqutaatillugit angalasoqartarpoq, angalanissamullu pilersaarut Sisimiut aamma Qaqortup akornannuinaq annikillilluinnarneqarsinnaasarluni.

Sinersortaatip Sarfaq Ittuup piginnaasai killeqarput. Massakkut angalanissamut pilersaarummi, siornatigornit umiarsualiviit amerlanerusut tikinniarneqarsimagaluarpup.

2023 sioqqullugu angalanissamut pilersaarutini, Avannaa aamma Kujataa sapaatip akunneri tamaasa tikinneqartarlutik, aasaanerani sapaatip akunneranut aalajangersimasumik pilersaaruteqarnikuuvoq.

⁴ DIS-ordningi: Dansk Internationalt Skibsregisterip (DIS) kingunerisaanik, qallunaat umiarsuaataanni umiartortut, qallunaajugunik allamiuugunilluunniit, akissarsiaminnut akileraarneq ajorput. DIS-ordningi EU-mi akuerisaavoq, nunallu eqqaamiutsinni, allanilu imarsiorfiusuni aqqiinernut assingusunut naapertuulluni. Aallerfik: <https://danishshipping.dk/seneste-nyt/2024/afskaffelse-af-dis-ordning-vil-vaere-en-katastrofe-for-dansk-skibsfart/>

Siornatigornit inoqarfiit amerlanerusut tikinneqartarnissaannik kissaateqarneq malillugu, aasaanerani sapaatip akunneranut ataasiarluni tikittarnermit, sapaatip akunneri marlukkaarlugit tikittalernermit angalanissamut pilersaarut 2023-mi allanngortinneqarpoq. Angalanissamut pilersaarut taanna, nassuiaatip saqqummiunneqarnerani sinersortaatip malippaa. Angalanissamut pilersaarut ilanngussa 4-tut ilanngunneqarpoq.

Umiarsualiviit sorliit angalanissamut pilersaarummit peerneqarnissaannik aalajangertoqarpat, sapaatip akunnikkaartumik sineriak sinerlugu angallassisoqartaleqqissinnaassaaq. Sapaatip akunnikkaartumik kaajallaasoqartarnissaa kissaatigineqassappat, sapaatip akunnikkaartumik kaajallaanermit umiarsualiviit soorliit ilaatinneqarnissaannik toqqartuinissami, 2023-mi aamma 2024-mi kisitsisitigut paasisutissat atorpeqarsinnaassapput.

Anglasseriaatsip massakut aaqqissuusaanera

Ilaasunik anglassinermut nunami maannakut anglasseriaatsip aaqqissuusaanera, nunami nunasittarnerup pissusia aalajangiisorujussuovoq. Kalaallit Nunaanni inoqarfiit imminnut qaninngillat, silap pissusaa immikkuullarissuovoq, inoqarfillu akornanni aqqusineqarani.

Anglasseriaatsip aaqqissuusaanerani Kalaallit Nunaannut, Kalaallit Nunaanniillu niuerneramik tunngavilimmik angallaviit, nunap iluani niuerneramik tunngavilimmik angallaviit kiisalu nunap iluani angallaviit kiffartuussinissamik isumaqatigiissutigut tapiissuteqarfiusut ipput. Kiffartuussinissamik isumaqatigiissuteqarfiullutik angallavinni qulimiguulimmik, umiarsuarmik kiisalu angallavinni ataasiakkaani suluusalimmik ilaasunik angallassoqartarpoq.

Ilaasunik angallassinissami mittarfiit, talittarfiilu pisariaqartinneqartut piginissaat aalajangiisuupput.

Mittarfiit, qulimiguulinnullu mittarfiit

Kalaallit Nunaanni anglasseriaatsini, silaannakut angallassineq pingaernerit ilagaat. Timmisartumik qulimiguulimmillu angallassinermi pingaartumik ilaasunik angallassisoqartarpoq, aammali annikinnerusumik nassiuksanik assartuisoqarsinnaasarluni.

Mittarfiit katillugit 13-iupput, pisortatigoortumillu qulimiguulinnut mittarfiit 46-Ilutik. Mittarfiit, qulimiguulinnullu mittarfiit Greenland Airportsimit pigineqarlutillu aqunneqarput. Mittarfiit, qulimiguulinnullu mittarfiit pingaartumik Air Greenlandimit atorineqartarput, aammali ingerlatsisunit allanit atorineqartarlutik. Air Greenland aamma Greenland Airports aktianik ingerlatseqatigiiffiupput, niuernermillu tunngavilimmik suleqatigiillutik.

Air Greenlandip angallaviisa Greenland Airportsip mittarfiit ataqatigiissippai, anglasseriaatsinilu piusuni sukkanersaalluni.

Air Greenlandip angallavii pingaarnertut pingasunut agguataarneqarsinnaapput:

- 1) Qulimiguulinnut attavik, nalinginnaasumik inoqarfinnik mikinerusunik inoqarfinnut allanut atassusiisoq.
- 2) Nunami suluusalinnut attavik, nalinginnaasumik illoqarfinnik illoqarfinnut allanut atassusiisoq.
- 3) Nunat tamalaat akornannut attavik, Kalaallit Nunaannik nunarsuup sinneranut atassusiisoq.

Angallaviit nunamik tamarmik atassusiisut 70-it missaanniipput.

Mittarfiit nutaat

Silaannakut angallassinermi aalajangiisuulluni ineriartortoq, Arctic Umiq Linemuinnaq sunniuttusaanani Kalaallit Nunaannut tamarmut sunniuteqartussa q tassavoq, nutaaliaasunik pingasunik mittarfillorneq.

Ilulissani, Nuummi, Qaqortumilu mittarfittaassat taakkua pingasut, takornialerinerup ineriartortinneqarnissaani pingaaruteqassasut naatsorsuutigineqarpoq. Mittarfittaassat takornarissat amerlassusissaannut sunniuteqarnissaat Siuariartornissamut Ineriartornissamullu misissueqqissaarnermi sammineqartussaammat, tamanna nassuiaammi matumami annerusumik sammineqassanngilaq.

Taamaakkaluartoq ilaasunik angallassinerup siunissamut pilersaarusionerqarnissaani naatsorsuutigisamik ineriartornissaq isiginngitsuusaaruminaappoq, taamaattumillu tassunga ataasiakkaatigut innersuussuteqassalluni.

Umiarsualiveqarnermut suliassaqarfik

Umiarsualiveqarnermut suliassaqarfik eqaatsumik assartuussinissamut, pilersuinissamut, aalisarnermut, takornarialerinerumullu tunngaviuvoq. Umiarsualiveqarnermut suliassaqarfik Umiarsualiviit pillugit Inatsisartut inatsisaatigut malittarisassiuunneqarpoq ⁵. Namminersorlutik Oqartussat, kommunit, namminersortut aamma Namminersorlutik Oqartussat aktianik piginneqatigiiffiata Sikuki Nuuk Harbourp pigisaannik umiarsualiveqarpoq.

Illoqarfinni 17-iusuni, inoqarfinnilu mikinerusuni 55-iusuni tamani talittarfeqarpoq. 2023-mi kisitsineq innersuussutigalugu, talittarfiit Namminersorlutik Oqartussat pigisaat 148-pput. Talittarfiit, tulattarfiit, sapsiat, puttasut, pituffeqarfiit puttasut il.il. katillugit 256-it missaat nalunaarsorneqarput.

Namminersorlutik Oqartussat umiarsualiviutaannut Namminersorlutik Oqartussat umiarsualiveqarnermut qitiusumik oqartussaapput, najukkamilu umiarsualiveqarnermut oqartussaanerup isumagineqarnissaa pillugu aalajangersakkanik aalajangersaasinnaallutik.

Qitiusumik oqartussaaneq attaveqaasersuutitut immikkoortortaqaqarfimmit susassaqaqartumit isumagineqarpoq. Najukkami umiarsualiveqarnermut oqartussaanerup isumagineqarnissaa pillugu ingerlatsisunut sisamaasunut isumaqatigiissuteqarpoq;

- 1) Royal Arctic Line A/S, umiarsualivinni anginerpaani aqqaneq-marluusuni umiarsualiveqarnermut oqartussaasoq.
- 2) Sikuki Nuuk Harbour A/S, Nuummi aamma Kangerlussuarmi umiarsualiveqarnermut oqartussaasoq.
- 3) KNI Pilersuisoq A/S, nunaqarfiit talittarfiini amerlanersaanni, illoqarfiillu marluk umiarsualiviini umiarsualiveqarnermut oqartussaasoq.
- 4) Mittarfeqarfiit, Narsarsuarmi umiarsualiveqarnermut oqartussaasoq.

Kommunit umiarsualiviutaanni kommunalbestyrelsi umiarsualiveqarnermut oqartussaavoq.

Kommunini talittarfinnik ataasiakkaanik, soorlu tulattarfinnik aamma puttasunik ilaatigut aalisartunit atornerqartunik nakkutilliineq, aserfallatsaaliinerlu kommunini oqartussaasut isumagisaraat.

Umiarsualivinni nammineq pigineqartuni, umiarsualivimmi ingerlatseqatigiiffik umiarsualivimmi oqartussaavoq.

Umiarsualiviit Kalaalit Nunaanni attaveqaasersuutaapput pisariaqavissut. Sineriak sinerlugu imaatigut ilaasunik angallassinerup ingerlalluarnissaanut, inoqarfinni tamani umiarsualiviit pingaaruteqarput. Taamaattumik umiarsualiveqarnermik aaqqissuusseqqinnissamik Naalakkersuisut aallartitsipput.

Umiarsualiveqarnermik aaqqissuusseqqinnermut pilersaarut

Namminersorlutik Oqartussat umiarsualivii nassiussanik tiguisinnaanissaat aamma nassitsiviusinnaanissaat, imarsiornermi inuussutissarsiutit angisut isumagissallugit, matumani aalisarnermik inuussutissarsiut ilanngullugu kiisalu imaatigut ilaasunik angallassineq isumagissallugu Naalakkersuisut anguniagaraat. Tamanna ineriartornermik siunertaqartumik pissaaq, illersorneqarsinnaasumillu pissalluni. Aserfallatsaaliinerumut, ingerlatsinerumut, nutarsaanerumut,

⁵ Umiarsualiviit pillugit Inatsisartut inatsisaat nr. 9, 3. juni 2015-imeersoq.

umiarsualiviillu allilissappata allilernerqarnissaannut aningaasartuutit eqqarsaatigalugit umiarsualiviit imminnut napatissasut anguniagaavoq.

Massakkut aaqqissuussaaneq taamak itsillugu siuliani suliassat nunami umiarsualiviit naammassisinnaassaneraat qularnarpoq. Attaveqaasersuutit nutaanngiliartornerat patsisaaneruvoq, soorluttaaq umiarsualiviit aserfallatsaalineqarsimanginnerini kinguaattoorutit annertusiartuinnarnerinik patsiseqartoq.

Umiarsualiveqarnermut suliassaqarfimmik ingerlatsinermi anguniakkat toqqarneqarsimasut allaaserineqarlutik, anguniakkat aallaavigalugit Naalakkersuisut sulipput:

- Nunami umiarsualiviit attaveqaasersuutini pisariaqavissut illersorneqassapput.
- Nunami umiarsualiviit nutarterneqarlutillu piorsarneqassapput.
- Umiarsualiviit tamarmik umiarsualivimmi sulisunut, atuisunullu isumannaatsuussapput.
- Umiarsualivimmi ingerlatseqatigiiffimmik pilersitsinerit, piujuartitsisussamik ingerlatsinissamut pilersaarummik tunngaveqassapput.
- Suleriaatsit, qinnuteqariaatsillu paasiuminartuussapput.
- Atuisut umiarsualivinni aningaasarsiorlut, umiarsualivinni akiliisassapput.
- Atuisunut akiliuteqartitsisarneq atuutsilersinneqassaaq, umiarsualivimmi ingerlatseqatigiiffiit Namminersorlutik Oqartussat piginnittuunermut politikkiat naapertorlugu pilersinneqassallutik.

Namminersorlutik Oqartussat umiarsualiviutaannik aserfallatsaaliisimanginnermi kinguaattoorutit 2021-mi 270 mio. koruuninut naatsorsorneqarput. Taamaalilluni nunami umiarsualivinnik ingerlatsineq pillugu nutaamik eqqarsartoqartariaqalerluni.

Atuisunut akiliuteqartitsisalernikkut aningaasartuutinik atorluaalluni umiarsualivimmik ingerlatsisinnaanissaq, umiarsualivinnut inatsit periarfissiivoq.

Umiarsualivimmi anginerusuni annertuumik suliaqarfiusuni atuisunut akiliuteqartitsisalernikkut, umiarsualiviit amerlanerusut aningaasatigut immiut napatissinnaalissapput. Taamaalilluni ingerlatsineq, aserfallatsaaliinerlu umiarsualiviit namminneq aningaasalersussavaat – tamakkiisumik imaluunniit ilaannakortumik. Taamaalilluni nunap karsianit ingerlatsinermut, aserfallatsaaliinermullu aningaasaliissutit allangortinneqanngippata, inoqarfinni mikinerusuni umiarsualivinnut sinneruttunut umiarsualivimmut ataatsimut aningaasat atorneqarsinnaasut amerlanerulissapput.

Pingaartumik umiarsuit takornariartaatit, umiarsuillu angisuut allat umiarsualivinni isaatitsissutigineqassasut naatsorsuutigineqarpoq. Umiarsuit takornariartaatit, kilisaatillu ineriartortitsisinnaaqqullutik atugassarititaasunik pitsaanerusunik ujartuipput. Atuisunut akiliuteqartitsisarnermi, Sarfaq Iltuup akiliuteqartinneqartanngissinnaassaaq.

Kiffartuussinissamik isumaqatigiissutit

Innuttaasut akulikitsumik, akikitsumillu angallanneqarsinnaaqqullugit, innuttaasunik angallassinerep tunngavilerneqarnissaanut kiffartuussinissamik isumaqatigiissutit sakkussaapput.

Angallaviit kiffartuussinissamik isumaqatigiissutitigut tapiissuteqarfiusut

Aningaasanut inatsimmi konto pingaarnermut 72.20.05 Ilaasunik angallassinermut tapiissutinut oqaasertaliussaq nr. 1 innersuussutigalugu, naalakkersuisut piginnaatinneqarput

”(...) 2021-miit ukiut qulit angullugit sivisussusilimmik, kontomilu pingaarnermi matumani siunertarineqartunut ilaasumik suliassat suliarisarnissaannut Air Greenland A/S-imik, Disko Line A/S-imik, Nordlandair-imik aamma og Arctic Umiaq Line A/S-imik isumaqatigiissusiornissamat. Tamatuma kingorna isumaqatigiissutit 2021-mi ukiut marlukkaarlugit ukiumik ataatsimik sivitsorneqarsinnaallutik, annerpaamillu 2021-mit ukiunik aqqaneq-marlunnik isumaqatigiissuteqarsinnaalluni.

Kiffartuussinissamik isumaqatigiissutinut tapiissutit pingaarnertut tunngavissat sisamaasut malillugit tunniunneqassapput, tassanilu ornitassanut:

- *angallannikkut periarfissaqartussaannikkaluanut,*
- *akit pissutigalugit angalaffigineqasinngitsorpassuarnut,*
- *akuttunerusumik tikinneqartartussaagaluanut*
- *angallavissatigut aqqissuussinermi ataqatigiinnikkut ajorfiusunut, tunniunneqassapput”*

Naalackersuisut Air Greenland A/S-imik, Nordlandair-imik, Disko Line A/S-imik aamma Arctic Umiaq Line A/S-imik kiffartuussinissamik isumaqatigiissuteqarput.

Angallassinissami suliassat ataasiakkaat, 2021-mit atuuttumik kiffartuussinissamik isumaqatigiissuteqarfiusut, tulliuuttumi tabelimi takussuserneqarput.

Tabel 1. Angallassinissami suliassat ataasiakkaat ullut atuutilerfia, atorunnaarfissaallu.

Nr. / periarfissaq	Angallassinissami suliassaq	Atuutilerfia	Atorunnaarfissaa
1	Qaanaap eqqaa	1/7-2021	31/12-2030
2	Upernaviup eqqaa	1/7-2021	31/12-2030
3	Uummanaq	1/7-2021	31/12-2030
4S	Qeqertarsuup Tunua, aasakkut, umiarsuaq	1/1-2021	31/12-2030
5H	Qeqertarsuup Tunua, ukiukkut, qulimiguulik	1/1-2021	31/12-2030
6H	Qeqqa, qulimiguulik	1/1-2021	31/12-2030
6S	Qeqqa, umiarsuaq	1/1-2021	31/12-2030
7H / 7A+	Kujataa, qulimiguulik	1/1-2021	31/12-2024
7S	Kujataa, umiarsuaq	1/1-2021	31/12-2030
8	Tasiilap eqqaa	1/7-2021	31/12-2030
9	Ittoqqortoormiit	1/7-2021	31/12-2030
10	Qaanaaq, suluusalik	1/7-2021	31/12-2030
11	Nerlerit Inaat, suluusalik	1/7-2021	31/12-2026
AUL	Sineriak sinerlugu imaatigut ilaasunik angallassineq, Sarfaq Ittuk	1/1-2021	31/12-2025

Air Greenlandip qulimiguuliutai, inoqarfiit angallavimmut atasut akornanni timmisartuussisarput. Air Greenlandip qulimiguuliutaasa angallaviisa tamarmiusut takussutissartaa, ilanngussaq 5-itut ilanngunneqarpoq.

Angallaviit nalinginnaasumik killilimmik ilaasoqarsinnaasarput, massakkullu akigitamut neqeroortoqarsinnaaqqullugu kiffartuussinissamik isumaqatigiissutit aqqutigalugit tapiissutit

pinngitsoorsinnaanagit. Paasissutissiissutigineqarsinnaavoq, qulimiguulimmik ilaasunik angallassinermut pisortat tapiissutigisartagaat, sineriak sinerlugu imaatigut ilaasunik angallassinermut tapiissutinit 17-eriaammik amerlanerummata, naak 2 – 2,5-eriaatiinnarmik ilaasunik angallassisoqartaraluartoq.

Disko Line A/S qulinit 60-it tikillugit ilaasoqarsinnaasunik, assigiinngitsunik angissusilinnik umiarsuaateqarpoq. Disko Line Namminersorlutik Oqartussat sinnerlugit ilaatigut Qeqertarsuup Tunuani aamma Kalaallit Nunaata Qeqqani, Kujataanilu imaatigut angallassisarpoq. Disko Linep takornarialeriviutini Disko Line Explorer aqutugalugu aamma attartortitsisarlungu takornarissanik angallassisarpoq. Umiarsuarmik anginerumaartumik, 2024-p aasaanit Kujataani angallassilertussamik Disko Line aamma sanatitsivoq.

Disko Line A/S aamma Arctic Umiaq Line A/S assigiinngitsunik suliaqartarlutik, assigiinngitsunik ingerlatsippot. Disko Line A/S pingaartumik qanittunut, najukkamiinnerusunilu kiffartuussisarpoq. Taamaattumik angallatinik mikinerumaartumik angallassisarpoq, aallaavittullu angallammi unnuinissamut, nerisitsinissamullu periarfissaqarani. Disko Linep angallataasa angissusaat patsisaallutik, silamik patsiseqartumik unammillernartunit eqqugaanerusinnaapput.

Arctic Umiaq Line A/S nallersuutissagaanni unnuiffusinnaasumik, nerisitsinnaasumillu anginerumaartumik sinersortaataateqarpoq. Inuiaqatigiinni pinartumik pisoqartillugu umiarsuup sumiinnera apeqqutaatillugu, sivikitsuinnarmik ilimasaaruteqarnikkut inuppasuit unnuiffissaannik, nerisassaannillu ikiuinissamik pisariaqartitsisoqartillugu tamanna pingaaruteqarsinnaavoq. Sinersortaati angissusaa patsisaalluni annikitsumik sikoqartillugu angalasinnaammat, tamassuma angallassinerep qajannaannera qulakkeerpaa.

Angalanissamut pilersaarut aasaanera, ukiuuneralu malillugu nikingavoq. Angalanissamut pilersaarut ilanngussa 4-tut ilanngunneqarpoq.

Ilanngussa 5-imi takuneqarsinnaasutut, Air Greenland inoqarfippaalunnut suluusalimmik, qulimiguulimmillu kiffartuussinissaminik isumaqatigiissuteqarpoq. Kiffartuussinissamik isumaqatigiissutit aningaasartaasa amerlassusiini, angalasartut amerlassusaat apeqqutaasarpoq. Imaappoq, angalasut angallassitutit assigiinngitsunik atuigunik, angallassisummik ataasiinnarmik atuisinnaanernit aningaasartuutit tamarmiusut amerlanerussapput. Taamaattumik missingersuutini aningaasaqarninnaq isigalugu, ornitassamut ataatsimut arlalinnik kiffartuussinissamik isumaqatigiissuteqaruni naleqqutinngilaq.

Niuernermik tunngaveqarlutik timmisartuussinermi angallaviit

Tamanut ammasunik nunami mittarfilinni Air Greenland suluusalinnik timmisartuussisarpoq. Air Greenland Kalaallit Nunaata iluani aamma Kalaallit Nunaata Danmarkillu akornanni kiisalu Kalaallit Nunaata Islandillu akornanni timmisartuussisarpoq. Suluusalit ukioq kaajallallugu timmisartuussisarput, sukkasuumillu angallassineq qulakkeertarlugu. Icelandair Islandip aamma Nuup, Ilulissat, Narsarsuaq, Kulusuullu akornanni angallaveqarpoq. Icelandairip angallavii niuernerinnarmik tunngaveqarput.

Nuummi Ilulissanilu mittarfittaarnikkut nunatta avataata aamma Kalaallit Nunaata akornanni nutaanik ingerlatsisoqalernissaa naatsorsuutigisariaqarpoq, soorluttaaq illoqarfiit mittarfeqarfiusut eqqaanni inoqarfinnut angalasunik amerlanerusunik angallassissoqartassasoq naatsorsuutigineqartariaqartoq.

Arctic Umiaq Line A/S-imik kiffartuussinissamik isumaqatigiissuteqarneq

Royal Arctic Line A/S-ip paasissutissiissutigaa, 2026-p naanissaata tungaanut Sarfaq Ittuk angallassissutigineqarsinnaassasoq. Taassumap kingorna umiarsuaq angallassisutigiinnarneqarsinnaassanersoq nalornarpoq. Taamaalilluni tulliuttut piaartumik qulaajarneqartariaqarput:

- Tapiissutitalimmik sineriak sinerlugu imaatigut angallassisarnerup unitsinneqaratarsinnaanera.
- Sarfaq Ittuup piusinnaaneranut sivitsorsaanissamut imaluunniit umiarsuarmik nutaamik sanatitsinissamut Royal Arctic Line A/S-imi aningaasartuuteqarnissaq.
- Illoqarfinnut, nunaqarfinnillu nassiussalerinerup aamma ilaasunik imaatigut angallassisarnerup sunniiveqatigiissinnaanerik isumaliutiginninneq.

Arctic Umiaq Line A/S-imut kiffartuussinissamik isumaqatigiissut 2021-mit atuuttoq, ukiunilu tallimani atuuttussa 2020-mi isumaqatigiissutigineqarpoq, tamannalu Sarfaq Ittuup piusinnaaneramik naatsorsutigineqartumut naapertuulluni.

Tabel 2. Arctic Umiaq Line A/S-imik kiffartuussinissamik isumaqatigiissut

Sinersortaat	Sarfaq Ittuk
Ingerlatsisoq	Arctic Umiaq Line A/S
Kiffartuussinissamik isumaqatigiissummut tapiissutit	7,6 mio. kr.
Isumaqatigiissutip atuuffia	1/1-2021-mit 31/12-2025-mut

Ukioq innersuussuviusoq 2021, isumaqatigiissutip atuuffiani qaammatisiutit ukiuat siulleq tamaat

Arctic Umiaq Line A/S kingullermik isumaqatiginninniarfigineqarmat, Sarfaq Ittuk qanoq siviutigisumik piusinnaassanersoq suli iluamik paasineqarsimangilaq.

Isumaqatiginninniarnernut atatillugu, taamanikkut kiffartuussinissamik isumaqatigiissutip atuuttup ukiunik tallimanik sivitsorneqarnissaanik Arctic Umiaq Line A/S neqeroorummik nassitsivoq.

Arctic Umiaq Line taamani nalilerpaa, umiarsuaq 2021-mit suli ukiuni tallimani umiartorsinnaassasoq. Kiffartuussinissamut isumaqatigiissummut massakkut tapiissutigineqartartut ukiumut 7,5 mio. koruuniusut attatiinnarneqassapput, naak 2021 aallarnerlugu kiffartuussinissamut isumaqatigiissut ukiumut 1,5 %-inik qaffattartussatut inissinneqaraluartoq. Umiarsuarmik aserfallatsaaliinermi aningaasartuutit qaffanneri patsisaallutik, qaffaasarnissat ilanngunneqarput.

Qeqertarsuup angallavigineqarnissaa pillugu Arctic Umiaq Line A/S, ukiuni kingullerni ilassutitut isumaqatigiissusiorfigineqartarpoq. Qeqertarsuup angallavigineqartarnera siornatigut ukiumut 200.000 koruuninik naleqartarpoq, taakkuali akiliutigineqartarunnaarsimallutik.

Arctic Umiaq Line A/S-ip kiffartuussinissamik isumaqatigiissuteqariaatsimut oqaaseqaatai

Kiffartuussinissamik isumaqatigiissutip suliarineqarnerani ilusiliamut aallaavigineqartumut tulliuttumi naliliinini, Arctic Umiaq Line A/S-ip Naalackersuisoqarfimmut saqqummiunnikuuaa:

Arctic Umiaq Line A/S misigisimavoq, ullumikkut ilusiliaq aningaasartuutunik aallaavilimmik kiffartuussinissamik isumaqatigiissutaasoq, suliassanillu aallaavilimmik kiffartuussinissamik isumaqatigiissusiorusunnerulluni. "Aningaasartuutunik aallaavilimmik kiffartuussinissamik

isumaqatigiissut” aamma ”suliassanik aallaavilimmik kiffartuussinissamik isumaqatigiissut”, Arctic Umiaq Linep nammineq suliniuteqarneratigut ineriartortinneqarput.

Tassungaa atatillugu aningaasartuutini aallaavilimmik kiffartuussinissamik isumaqatigiissut ima paasineqassaaq, ingerlatseqatigiiffiit ornitassanut ilaasunik angallassisartut amigartoorutai matussuserlugit kiffartuussinissamik isumaqatigiissutaasoq.

Suliassanik aallaavilimmik kiffartuussinissamik isumaqatigiissut ima paasineqassaaq, aalajangersimasumik akigititaq malillugu aalajangersimasumik suliassanik nassuiaassilluni kiffartuussinissamik isumaqatigiissutaasoq.

Suliassanik aallaavilimmik kiffartuussinissamik isumaqatigiissutini ilaatinneqarsinnaasunik Arctic Umiaq Line tulluuttunik assersuusiaqarpoq: Nakorsaatini, allakkanik, nassiuksanik oqinnerusunik assartuineq kiisalu ”atugarissaarnerup aamma peqqissutsip ataani, soorlu assersuutigalugu utoqqarnik isumassuinnermut, peqqinnissamut immikkoortortamut aamma isumaginninnermut aqutsisoqarfimmu immikkut ittumik neqeroorutit”.

Arctic Umiaq Linep nalilerpaa, kiffartuussinissamik isumaqatigiissutini suliassat aallaavigineqarpata, inuiaqatigiinnut iluaqutaasussanik suliassanut Arctic Umiaq Line tunngavissiinerusinnaassasoq. Taakkuninga ujartuinnernik Naalakkersuisoqarfik ilisimasaqanngilaq, taamaalillunilu tassannga naliliisinaanani.

Arctic Umiaq Linep nalilerpaa, Namminersorlutik Oqartussat Arctic Umiaq Linemik nalilersuinnaanissaani suliassanut ersarissunik piumasaqaasiortoqartariaqartoq.

Suliassanik aallaavilimmik kiffartuussinissamik isumaqatigiissutini iluaqutissatut Arctic Umiaq Linep ersarissarpaa, suliakkiissutigineqartup iluani annerusumik imaluunniit immikkut aningaasartuuteqassanngitsaq, sinersortaatillu maannamit tikittagai amerlanerussasut. Ujartuineq, akgititarlu ersarinnerusumik nassuiarneqanngimmata, pilersaarutillu aningaasaqarneranik tamarmiusumik naliliinnermi ilaatinneqartariaqarmat, tamanna iluoornersoq, ilumuunnginnerlorluunniit Naalakkersuisoqarfiup uppersarsinnaanngilaa.

Arctic Umiaq Line A/S-ip pilersaarutaannik naliliineq

Arctic Umiaq Line piumaffigineqarnermigut, sinerik sinerlugu imaatigut ilaasunik angallassinissamut periarfissaasinnaasunik tallimanik suliaqarlunilu, Ineqarnermut Attaveqaasersuutinullu Naalakkersuisoqarfimmu nassitsivoq.

Periarfissat ilanngussaq 3-tut ilanngunneqarput.

Arctic Umiaq Linep periarfissatut siunnersuutigisai, allatigut ilaasunik angallassinermu kinguneqassapput. Tamatumani periarfissaq sunaluunniit toqqarneqarpat.

Mittarfittaassat nunami angalasariaatsimut annertuumik sunniuteqarnissaat eqqarsaatigalugu, ilaasunik angallassinermu sinneranut kingunissai kisitsisitigut paasissutissat massakkut pigineqartut atorlugit naatsorsorneqarsinnaanngillat.

Tulluuttut atualersinnagit, ilanngussaq 3 atuarneqassasoq inneruussutigineqarpoq.

Aningaasaliiffigineqarnissamut pisariaqartitsineq

Arctic Umiaq Line nutaanngorsarneqassaguni, ineriartortinneqassagunilu annertuumik aningaasaliisoqartariaqarpoq.

Arctic Umiaq Line A/S-ip siunissamut periarfissaa suna toqqarneqarnersoq apeqqutaalluni, aningaasaliiffineqarnissamut pisariaqartitsinerit assigiinngitsuussapput. Tak. aallarniutaasumik aningaasaliineq pillugu ilanngussaq 1.

Arctic Umiaq Linemik atorunnaarsitsinermi aningaasaliisoqarnissaa pisariaqartinneqassanngilaq.

Arctic Umiaq Linemik allannguutitaqanngitsumik ingerlatsisoqaruni Arctic Umiaq Linep naatsorsuutaasa takutippaat, aningaasaliiffineqarnissamik pisariaqartitaq qanoq annertutigissanersoq nalorninassasoq.

Arctic Umiaq Linemik nutaanngorsaasoqassaguni 250-350 mio. koruunit aningaasaliissutigineqartariaqassapput. Arctic Umiaq Linemik ineriartortitsinissamut, nutarsaanissamullu 400-600 mio. koruuninik aningaasaliisoqartariaqassaaq.

Kisitsisit tamarmik Arctic Umiaq Linemeersuupput, nalorninarloqarlutillu. Taamaattumik kiffartuussinissamik isumaqatigiissutip aningaasartaata annertussusaa aamma annertuumik nalorninartutaqarluni.

Periarfissani tamani iluaqutissat, ajoqutissallu saqqummiunneqarnerisigut periarfissat taakkua tallimaasut ersarissassallugit, tulliuttumi tabelit siunertaqarput. Periarfissap sorliup ersarinnerusumik misissorneqarnissaanik isumaliutiginninnissami, tulliuttumi nassuiaat atorneqarsinnaavoq.

Arctic Umiaq Linep periarfissaanni aningaasaqarnikkut iluaqutissat, ajoqutissallu ilaat tabelini ersersinneqarput.

Tabel 3. Arctic Umiaq Linep periarfissaata A-p iluaqutissartai, ajoqutissartailu

Periarfissaq A: Arctic Umiaq Line A/S-imik atorunnaarsitsineq	
Iluaqutissartai:	<p>Ungasissunut ilaasunik angallassinerep annersaa silaannakkut ilaasunik angallassinerusaaq, silaannakkullu angallassinermi inissaq atorluarneqarluni.</p> <p>Angallassissummik ataasiinnarmik angalasut angallanneqartassapput, taamaalillunilu inissaq atorneqanngitsoq atorneqarsinnaalissaaq, ataatsimullu isigalugu niuernerimik eqqarsarluni angallavik soqutiginarnerulissalluni. Assinganik mittarfiit aningaasaqarnerat pitsaanerulissaaq.</p> <p>Angalasut sivikinniararsuarmik angalasalissapput.</p> <p>Aaqqiissut una, Assartuussineq pillugu isumalioqatigiissitap isumaliutissiissutaani innersuussutinut naapertuutissaaq.</p>
Ajoqutissartai:	<p>Ungasissunut imaatigut ilaasunik angallassineq periarfissaajunnaassaaq. Taamaalilluni suluusalimmik imaluunniit qulimiguulimmik angallassinermut sanilliullugu innuttaasut akikinnerungaatsiartumik angalasinnaajunnaassallutik.</p> <p>Silaannakkut angallassinermut sanilliullugu, imaatigut ilaasunik angallassineq anorimit, putsumillu sunnertinnginnerusarpoq. Taamaattumik Arctic Umiaq Line atorunnaarsinneqassappat, angallasseriaaseq tamarmiusoq eqqugaasinnaanerulissaaq.</p> <p>Arctic Umiaq Linemik matusinikkut aalajangersimasumik suliffiit 50-inik amerlanerusut annaaneqassapput. Tassunga tunngatillugu malitsigisaanik suliffissaqartitsineq aamma annaaneqassaaq. Taamaakkaluartoq sulisussat annertuumik amigaatigineqarput, taamaattumillu sulisut eqqorneqartussat allami suliffittaarsinnaanissaat naatsorsuutigineqassalluni.</p>

Tabel 4. Arctic Umiaq Linep periarfissaata B-p iluaqutissartai, ajoqutissartailu

Periarfissaq B: Arctic Umiaq Line A/S-imik allannguutitaqanngitsumik ingerlatsineq	
Iluaqutissartai:	Periarfissami uani ungasissumut imaatigut angallanneqarsinnaaneq attatiinnarneqassaaq. Arctic Umiaq Line A/S-imik nutarsaanissamik imaluunniit atorunnaarsitsinissamik aalajangiinissaq, mittarfittaassat atulernissaasa tungaannut kinguartinneqassaaq. Taamaalilluni Arctic Umiaq Linep siunissaa pillugu aalajangiinissami, umiarsuaateqarfiup ingerlatsivissaani niuerneq pillugu tunngavissalimmik aalajangiisoqarsinnaassaaq.
Ajoqutissartai:	Atorunnaarsitsinissamik imaluunniit nutarsaanissamik inaarutaamik aalajangiinissaq ukiualunnik kinguartinneqassaaq, aaqqiissutaagallartumillu isigineqarsinnaalluni. Sarfaq Ittuk angallataavoq ullutsinnut naleqqukkunnaarnikoq, taamaattumillu aaqqiissutaagallartoq ingerlatsinermi isumannaassutsip aarlerinarsigaluttuinnarneranik kinguneqassalluni. Umiarsuup pisoqaanerata kingunerisaanik ingerlatsinermi aningaasartuutit qaffakkiartuinnassasut naatsorsuutigineqarpoq, taamaattumillu kiffartuussinissamik isumaqatigiissut imaluunniit angalasut aqutugalugit akiliutit qaffakkiartussasut naatsorsuutigineqarluni.

Tabel 5. Arctic Umiaq Linep periarfissaata C-p iluaqutissartai, ajoqutissartailu

Periarfissaq C: Arctic Umiaq Line A/S-imik nutarsaaneq	
Iluaqutissartai:	Umiarsuaq nutaaq imarsiullaqqinnerussammat, umiarsuaq sukkanerungaatsiassasoq, innuttaasullu iluarnerusumik angalasalissasut naatsorsuutigineqarpoq. Sinersortaatip nutaanngilisup taarserneqarneratigut, ingerlatsinermut ataavartumik aningaasartuutit annikinnerussapput.
Ajoqutissartai:	Imarpik qulaallugu timmisartuussinernut mittarfiit nutaat kingunerisaannik takornarissat amerlinissaannik naatsorsuuteqarnermik atorluanaanissamik, periarfissaq C killiliissaaq. Sinersortaatissamik nutaamik pisissagaanni annertuumik aningaasaliisoqartariaqarpoq, tamannalu Arctic Umiaq Linep massakut akissaqartinnagu. Arctic Umiaq Linep siunnersuutigaa, Namminersorlutik Oqartussat umiarsuaq akilissagaat, kiffartuussinissamillu isumaqatigiissut akilissagaat. Tamatumunnga nunap karsiata missingersuutaani aningaasanik immikkoortitsisoqarnikuunngilaq. Annertuumik aningaasaliineq, inissamik killilimmik annertusaanermik kinguneqaannassaaq, aningaasaliinerlu imminut akilersinnaanissaa ilimanarani, Arctic Umiaq Linellu Namminersorlutik Oqartussanik kiffartuussinissamik isumaqatigiissuteqartarnini sulii pinngitsoorsinnaassanagu.

	<p>Sarfaq Ittuup pisariaqartitai malillugit umiarsuaq ilusilersorneqassagaluarpoq, taassumallu kingorna sanallugu aallartinneqarsinnaassalluni. Naammassilluni tunniunneqarnissaa sivisuumik utaqqineqassasoq naatsorsuutigineqarpoq.</p>
--	---

Tabel 6. Arctic Umiaq Linep periarfissaata D-p iluaqtissartai, ajoqtissartailu

Periarfissaq D: Arctic Umiaq Line A/S-imik ineriartortitsineq, nutarsaanerlu	
Iluaqtissartai:	<p>Umiarsuarmik nutaaliaasumik, ullutsinnut naleqquttumik, anginerusumillu pigisaqarnikkut, sineriak sinerlugu imaatigut ilaasunik angallassineq siunissamut ungasissumut ingerlaannarsinnaassaaq. Periarfissami tassani ulloq-unnuarlu angallassisoqarsinnaassaaq, taamaalillunilu Arctic Umiaq Linep angallaviani ornitassat amerlanerusut ilanngunneqarsinnaalissallutik.</p> <p>Umiarsuaq nutaaq imarsiullaqqinnerussammat, umiarsuaq sukkanerungaatsiasasoq, innuttaasullu iluarnerusumik angalasalissasut naatsorsuutigineqarpoq.</p> <p>Ingerlatsinermut ataavartumik aningaasartuutit annikinnerussapput.</p> <p>Maani innuttaasut siunnerfigalugit, umiarsuarmi atugassarititaasunik naleqqussaasoqarsinnaassaaq.</p> <p>Umiarsuarnik takornariartaatilerinerup sukkaasuumik ineriartornerani niuernermit iluanaaruteqaqataaneq, takornarissallu isertitsissutigineqassallutik. Arctic Umiaq Linemit ilimagineqarpoq, imminut napatittumik ingerlatsinissaq anguniarlugu, takornarissanit isertitaqarnerulerneq kiffartuussinissamik isumaqatigiissummik annikillisisiartuaarnermik kinguneqassasoq. Umiarsuit typit taakkua sanaartorneqartareernerat, atorneqartareernerallu, taamaattumillu periarfissaq C-mut sanilliullugu umiarsuaq allat sukkanerungaatsiartumik pissarsiarineqarsinnaanissaa, periarfissami tassani annertuumik iluaqtissaavoq.</p>
Ajoqtissartai:	<p>Arctic Umiaq Linep nammineerluni aningaasalersorsinnaanngisaanik, taamaattumillu nunap karsianit allatigulluunniit aningaasaliiffigineqartussamik minnerpaamik 450 mio. koruuninik aningaasaliinissaq. Tamatumunnga nunap karsiata missingersuutaani aningaasanik immikkoortitsisoqarnikuunngilaq.</p> <p>Arctic Umiaq Linep naatsorsuutigaa, innuttaasut amerlanerusut Air Greenland aqutugalugu angalanatik sinersortaammik angalarusunnerussasut. Ilimagisaq taanna ilumuussappat, qularnanngitsumik kiffartuussinissamik isumaqatigiissutit isumaqatiginninniutigineqaaqqinnissaanik Air Greenland kissaateqassaaq.</p> <p>Umiarsuarmik takornarissanik angallassisarnissaq massakkut siunnerfigeqqagaanni, ingerlatseriaaseq tamanna nunat tamalaat akornanni umiarsuarmik takornarialeriaatsimit allaanerulluni unammillissammat, tamanna annertuumik aarlerinartumik nassataqarpoq.</p> <p>Angallassinermi avataanit angalajartortut pinngitsoorneqarsinnaassanngillat, tamannalu maani najugaqartut kissaataannik, pisariaqartitaannillu salliutitsinissamut periarfissanik killiliisinaalluni.</p>

	<p>Taanna annertuumik sinneqartooruteqartitsissangatinneqanngilaq, kiffartuussinissamilli isumaqatigiissummut akiliuteqartariaqarnissamik kinguneqassalluni.</p> <p>Taamaalilluni umiarsuarmik takornariartaammik takornarissanik namminersorluni niuernerq sinneruttoq annikinniararsuussaaq. Naligiinngitsumik atugassaqarluni pisortat ingerlatseqatigiiffiutaannut kiffartuussinissamik isumaqatigiissuteqartumut unammilleqatigiissagunik, tamanna namminersorlutik takornarialerisunut iluaqutaassanngilaq.</p>
--	---

Tabel 7. Arctic Umiq Linep periarfissaata E-p iluaqutissartai, ajoqutissartailu

Periarfissaq E: Arctic Umiq Line A/S-imut umiarsuarmik piusumik sivisuumik attartorneq	
Iluaqutissartai:	<p>Umiarsuarmik nutaamik pisinermut sanilliullugu, annikinnerujussuarmik aningaasaliisariaqarneq. "Sinersortaat" nutaaq piffissap sivikitsuinnaap iluani ilimasaaruteqarnikkut pissarsiarineqarsinnaassaaq.</p> <p>Umiarsuup nutaaliaalluni anginerusup, nunat tamalaat assigiinngitsut aallaavigalugit umiarsuarmik takornariartaatilerinermut pituttorsimanngitsumik, aarlerinarsinnaasumillu nassatalimmik siumut 450 mio. koruuninik aningaasaliinertaqanngitsumik, unammillernissaanut periarfissaanik misilittaanissamut periarfissaq.</p> <p>Umiarsuarmik takornariartitsinermik misiliineq iluanaaruteqarnermik nassataqassappat, kiffartuussinissamik isumaqatigiissut annikillisikkiartuaarneqarnissaanut imaluunniit siunissami ungasinnerusumi nutaamik umiarsuarsinissamut aningasaanik katersinissamut periarfissaqassaaq.</p> <p>Sarfaq Ittummik atorunnaarsitsineq, umiarsuarmik nutaanngitsumik ingerlatsinermut, aserfallatsaaliinermullu aningaasartuutit annikinnerussapput.</p> <p>Kissaatigineqassappat sinersortaat piffissani assigiinnitsuni nutarterneqarsinnaalluni, tamanna ineriartortitsinermik aaqqiissutissaavoq.</p> <p>Arctic Umiq Line naapertorlugu, misilittakkanik ineriartortitsinissami periarfissaq E pitsaanerpaassaaq. Umiarsuarmik takornariartaatilerinerup iluaniinnaq misilittagaqalerani, inuttalli umiarsuarmi nutaami suliaqarnissamik ilinniartinneqariartuarlutillu ilinniarnissaannut aamma periarfissaassaaq.</p>
Ajoqutissartai:	<p>Kiffartuussinissamik isumaqatigiissutinut nunap karsianit aningaasartuutissat, nutaamik umiarsuarsilluni periarfissaq D-tut ipajaassapput, kisianni umiarsuarmik pisinani attartornermut akiliuteqartoqartassaaq.</p> <p>Umiarsuaq ilusilersoriigaallunilu sanariigaassammat, Kalaallit Nunaannilu pisariaqartitanut naapertuulluinnartumik umiarsuarmik piusumik nassaartoqarsinnaassanngitsoq nalilerneqarmat, naaperiaassutissat arlaliusussaassapput.</p> <p>Umiarsuaq sikusiutigineqarsinnaangortillugu, unnuiffigineqarsinnaasunngortillugulu allanngortiterneqarnissaanut aallarniutaasumik aningaasaliisoqartariaqassasoq ilimanassaaq.</p> <p>Umiarsuarmik takornariartaammik takornarissanik namminersorluni niuernerq sinneruttoq annikinniararsuussaaq. Naligiinngitsumik atugassaqarluni pisortat</p>

	ingerlatseqatigiiffiutaannut kiffartuussinissamik isumaqatigiissuteqartumut unammilleqatigiissagunik, tamanna namminersorlutik takornarialerisunut iluaqutaassanngilaq.
--	---

Takornialerineq, siunissamilu sineriak sinerlugu imaatigut angallassinisaaq

Periarfissat assigiinngitsut Arctic Umiq Line A/S-ip saqqummiussai, nunami takornialerinerup qanoq ineriartorsinnaaneranut apeqqummut atalluinnarput.

Arctic Umiq Linep naatsorsuinerisa annersaat, nutaaliaanerumik ilaasunik angallassinissamut takornarissat avataaneersut aningaasatigut tunngavissiinerunissaannik aallaaveqarput.

Sineriak sinerlugu imaatigut ilaasunik angallassineq, umiarsuarmut takornariartaammut ilaalluni misigisassarsiortarnernut assingusumik nunani allamiunut neqerooruteqartarnerunissamik Arctic Umiq Lines A/S-ip allannguiniarnera, umiarsuarmut takornariartaammut ilaallutik Kalaallit Nunaannut takornariartartut ineriartornerinik annerusumik tunngassuteqarpoq.

Umiarsuarnik takornariartaatinik Kalaallit Nunaata imartaani takornialerinerup 2015-imit, 2023-p tungaanut ineriartornera tabel 5-imi takuneqarsinnaavoq. Umiarsuarmut takornariartaatinut ilaallutik takornariartartut amerlialuttuinnarput takuneqarsinnaavoq.

Tabel 8. Umiarsuarmut takornariartaatinut ilaasut amerlassusii

	2015	2016	2017	2018	2019	2020	2021	2022	2023
Katillugit	25.049	24.244	38.182	45.739	46.633	-	-	43.999	76.477

Aallerfik: Kalaallit Nunaanni Naatsorsueqqissaartarfik, Kisitsisaataasivik

Umiarsuarmut takornariartaatinut ilaallutik takornarissat annertuumik amerleriarnersa saniatigut, unnuisarfinni unnuisartut aamma annertuumik amerleriartarput. Sumiuussuseq, qangalu unnuinerit amerlassusaat Tabel 6-imi takutinneqarput.

Tabel 7. Unnuisup najugaa, qangalu unnuinerit malillugit Kalaallit Nunaanni unnuinerit amerlassusaat

	2015	2016	2017	2018	2019	2020	2021	2022	2023
Nunatsinneersut	121.98 2	139.30 1	144.360	139.86 8	130.87 5	122.83 2	154.86 1	182.52 6	178.666
DK-meersut	50.496	51.817	57.090	54.818	72.246	32.709	54.660	101.95 4	98.893
Nunanit allaneersut	95.543	101.33 0	107.514	106.79 7	118.55 0	40.063	66.238	156.75 0	158.169
Ilisimaneqanngitsut	1.002	-	10.919	12.617	15.405	11.171	21.388	21.122	22.207

Aallerfik: Kalaallit Nunaanni Naatsorsueqqissaartarfik, Kisitsisaataasivik

Takornarialerinermi massakut aqqissuussaaneq, takornariartartunut amerlialuttuinnartunut naleqqussarsimangitsoq nalinginnaasumik ilisimaneqarpoq.

Air Greenlandip nunami tamarmi ullormi ataatsimi angalasoqarsinnaaqqullugu inissaatiminnik atuilluarumallutik, 2024-25-p ukiuuneranit angallassinissaminnik pilersaarutitik allanngortippaat. Air Greenlandip inissaqassutsini atorluarsinnaaqqullugu, nunamilu tamarmi siuariartortitsiumalluni suliniutigaa. Kalaallit Nunaat ornitassat nammassinnaangisaminik takornariaqarpallaaleratarsinnaassanersoq, siuliani allassimasut tunuliaqutaralugit ersarluppoq. Tamanna pingaaruteqarpoq, mittarfittaassallu atulernerat kiisalu Siuariartornissamut Ineriartornissamullu misissueqqissaarnerup naammassineqarnera ilutigalugu paasiartuaarneqartussat naatsorsuutigineqarluni.

Ilaasunik angallassineq Siuariartornissamut Ineriartornissamullu misissueqqissaarnermi kisimi sammineqanngilaq, aammali unnuiffissat amerlassusaat, umiarsualivinnut tunngasut, mittarfinnut tunngasut, sullissinerit il.il. sammineqarlutik. Tassangaanniit kisitsisitigut paasissutissat, takornarialerinerup nunamut tamarmut siammarneqarnissaanik politikkikkut kissaatit naammassineqarnissaannut aalajangiinissamut aamma tunngavissiisnaapput.

Naalackersuisoqarfiup nalilerpaa, mittarfittaassat atulernissaasa tungaannut, atulereerpatalu kisitsisitigut paasissutissat nutartikkat pigineqalernissaasa tungaannut aalajangiisoqanngikkallaruni naleqqutissasoq.

Aningaasatigut massakut sinaakkutaasut allanngornissaannik pisariaqartitsineq

2024-mut Aningaasanut Inatsimmi *konto pingaarnermut 72.20.05 Ilaasunik angallassinermut tapiissutinut* 198,5 mio. koruunit immikkoortinneqarput. Allassimasutut aningaasat *"Kalaallit Nunaanni Namminersorlutik Oqartussat sullissisullu kiffartuussinissamik isumaqatigiissutaat tunngavigalugu nunaqarfinni isorliunerusunilu ilaasunik angallassinerup ingerlaannarnissaanut akiliuteqarnissamut aningaasartuutit matuneqarnissaannut aningaasaliissutit"* matussutit atorneqassapput.

Arctic Umiaq Linep ingerlatsinerminik nutarsaanissaminut, ineriartortitsinissaminullu kiffartuussinermut isumaqatigiissutinut akiliutit tunngaviusutut Arctic Umiaq Linep isigai.

2024-mut Aningaasanut Inatsimmi kiffartuussinissamut isumaqatigiissutinut tamarmiusumik akiliutissat, tabel 4-mi takussuserneqarput. Arctic Umiaq Line A/S-ip massakut kiffartuussinissamik isumaqatigiissutaa 2024-mi 8 mio. koruuniuvoq.

Tabel 8. 2024-mut Aningaasanut Inatsimmi kiffartuussinissamik isumaqatigiissutinut aningaasalersuineq

Ingerlatsinermi naatsorsuutigisamik kisitsisissat	R 2022	AI 2023	AI 2024	M 2025	M 2026	M 2027
	---- 1.000 kr. ----			---- mio. kr. ----		
Qaanaaq	19.344	19.600	19.900	20,2	20,5	20,8
Upernavik	21.762	22.100	22.400	22,8	23,1	23,4
Uummannaq	20.754	21.100	21.400	21,7	22,0	22,4
Qeqertarsuup Tunua, umiarsuaq	12.822	12.800	12.800	12,8	12,8	12,8
Qeqertarsuup Tunua, qulimiguulik	19.387	19.500	19.800	20,1	20,4	20,7
Qeqqa, umiarsuaq	1.837	1.800	1.800	1,8	1,8	1,8
Qeqqa, qulimiguulik	5.566	2.500	2.500	2,5	2,6	2,6

Kujataa, umiarsuaq	12.382	12.500	12.500	12,5	6,9	6,9
Kujataa, qulimiguulik A+	33.249	41.800	44.400	45,0	9,6	9,6
Tasiilaq	18.840	19.100	19.400	19,7	20,0	20,3
Ittoqqortoormiit	9.168	9.300	9.400	9,6	9,7	9,9
Qaanaaq FW	4.634	4.700	4.800	4,8	4,9	5,0
Nerlerit Inaat FW	1.328	2.900	1.900	1,9	1,9	1,9
Arctic Umiaq Line A/S, Qeqertarsuaq ilanngullugu	0	7.800	8.000	8,1	7,8	7,7
Nordlandair	8.926	0	1.000	1,1	1,1	1,1
Akikillilerut, AG	0	-4.500	-3.500	-3,5	-1,0	-1,0
Katillugit	190.000	193.000	198.500	201,1	164,1	165,9

Arctic Umiaq Line A/S-imut kiffartuussinissamik isumaqatigiissutitigut akiliutigineqartartut annertusineqassappata, kiffartuussinissamik isumaqatigiissutinut aningaasartuutissat aningaasanut inatsimmi pingaarnersiorneqaqqinngikkunik, aningaasartuutit annertusineqassapput.

Kiffartuussinissamik isumaqatigiissutinut tapiissutit sapinngisamik, kiffartuussinissamillu isumaqatigiissutinut aningaasanik atugassiisarnermi tunngavinnut naapertuuttumik atorluarneqassapput, tak. Kiffartuussinissamik isumaqatigiissutit pillugit siuliani immikkoortumi nassuiaatigineqartutut *konto pingaarnermut 72.20.05 Ilaasunik angallassinermut tapiissutinut* oqaasertaliussa.

Tunngavissat taakkua naammassineqartut nalilerneqarpoq. Sarfaq lttuup kitaata sineriaa, umiarsuarmik angalasartunut atatippaa.

Inerniliineq

Sineriak sinerlugu imaatigut ilaasunik angallassisarneq ukiorpassuarni piunikuuvoq, Arctic Umiaq Line A/S-illi allannguinissaq tikeqqallugu.

Sinersortaammik Sarfaq lttummik ingerlatsineq akitsoraluttuinnarpoq. Ingerlatseqatigiiffiullu nammineerluni nalilerpaa, sineriak sinerlugu imaatigut ilaasunik angallassisarneq attatiinnarneqassappat, Arctic Umiaq Linemut tapiissutit amerlineqarnissaat politikikkut tapersorsorneqartariaqartoq.

Assartuussineq pillugu isumalioqatigiissitap isumaliutissiissutimini inerniliuppaa, sineriak sinerlugu imaatigut ilaasunik angallassineq matuneqassaguni kingunissai, ingerlatsinermi aningaasaqarnermut tunngasariaqanngitsut arlaliussasut.

Taamaalilluni Assartuussineq pillugu isumalioqatigiissitap isumaliutissiissutaani 2011-meersumi, kingunissai ima allaaserineqarput:

"- Isumaginninnermut sunniutissat. Takutinneqareersutut ullumikkut imaatigut angallassinermi akikillisaavigineqarsinnaasartut timmisartumik angallassinermut nuunnermi angalanermut amerlanerusunik aningaasartuuteqartalissapput. Tassani umiarsuarmik angalasartut 20 procentiisa missaat pineqarput. Taakku saniatigut maannakkut timmisartumut bilitseqartitseriaatsimi bilitit ikittuinnaat akikitsuusarput. Sinerialli sinerlugu imaatigut angallassinermup matuneqarnerani sipaagassat ima amerlatigippat, allaat politikikkut aalajangertoqassappat sullinneqartut taakku taarsiivigineqarsinnaallutik.

- Piffissap sivikitsup iluani timmisartumut bilitsinit akikinnerusumik angallavinnut arlalinnut aallarsinnaanissamut periarfissat, tamatumalu saniatigut umiarsuarmik angalanermut naleqqiullugu timmisartumik angalanermi nassatigut killilersuutit annerusarput.

- Angallaviup matuneqarneratigut kitaata sineriaani illoqarfiit nunaqarfiillu akornanni imaatigut angalanermi ileqqut kulturillu oqaluttuarisaanerani misigisassat, kiisalu ataatsimoorsinnaaneq tammassapput.

- Ilaasut arlallit, ullumikkut AUL-imut ilaasartut sineriak sinerlugu imaatigut angallassineq matuneqassappat immaqa angalasarunnaarniarlutik aalajangissapput. Tamanna nuttarsinnaanermik killiliissaaq aammalu inuiaqatigiinnut toqqaannangitsumik sunniuteqassalluni.

- Assartueriaatsit marluusinnarlutik ataasiinnangortinneqarpat angallassisarneq sunnertiasorujussuannugussaaq, soorlu qaqqat innermik anitsisartut anitsineranni il.il., kiisalu pissutsit allat, soorlu suliumajunnaarnerit nalliunneranni. Tamatumunngali atatillugu oqaatigineqartariaqarpoq, angalasartut ataatsimut isigalugit umiarsuarmik angalasartut ikittuaraannaammata, takuuk ilusiliaq 15.2.2, taamaattumillu angallasseriaatsip pinngortitami pisoqarnerani il.il. annertuumik sunnertianera atuutiinnassaaq. Timmisartumik angallassinert unitsinneqarpata, imaatigut angallassinermi pisinnaasat pilertortumik ulikkaarneqassapput. Paarlattuanik ajornartoortoqarnerani umiarsuit angallatillu nunaqarfiliartaatit Kalaallit Nunaanni pigineqartut tamaasa atorlugit imaatigut angallassinissaq periarfissaavoq, tamannalu angallassinermi pisinnaasanik annertuunik pissarsiaqarfigineqarsinnaavoq. Tamannali sineriak sinerlugu angallaviup atuunnerani atuutinninneranilu periarfissaassaaq.⁶

Ineqarnermut Attaveqaasersuutinullu Naalackersuisoqarfiup nalilerpaa, siulianiittoq sulit atuuttoq.

Ingerlatsinerimi aningaasaqarneq isiginiarlugu Assartuussineq pillugu isumalioqatigiissitaq ersarissumik ima inerniliivoq:

"Kisiannili ingerlatsinerimi aningaasaqarnermut sunniutissanut naliliissutitut allattorneqartut malillugit Assartuussineq pillugu Isumalioqatigiissitaq inerniliivoq, sineriak sinerlugu angallaviup piaartumik, tassalu 2010-mi piffissaq angallassiffiusoq naappat matuneqarnissaa aningaasaqarnikkut iluanaarnarnerpaassasoq⁷."

Taamaalilluni missingersuutini aningaasaqarneq isigigaanni, Arctic Umiaq Line A/S atorunnaarsinneqaruni iluaqutaanerpaassasoq qularineqanngilaq.

Taamaakkaluortoq pissutsit politikkikkut isummerfigineqartariaqartut arlaqarput.

- Sarfaq Ittuup inuiaqatigiinnut tapersiinera tamarmiusoq, kiffartuussinissamik isumaqatigiissutini aningaasartuutitut naapertuuppa?
- Umiarsuarnut takornariartaatitut ilaallutik takornariartartunik Arctic Umiaq Line angallassisalissasoq kissaatigineqarpa?

Taamaassimappat, Arctic Umiaq Linep nutaamik umiarsuartaarnissaanut Namminersorlutik Oqartussat toqqaannartumik aningaasaliissanersut isummerfigineqassaaq imaluunniit taarsigassarsinissami qularnaveeqqusiinissaq kissaatigineqarpa?

⁶ Assartuussineq pillugu isumalioqatigiissitap isumaliutissiissutaata qallunaatuani qupp. 353f, kalaallisoortaanilu qupp. 447f

⁷ assinga.

- Naamiusimappat, Namminersorlutik Oqartussat ingerlatseqatigiiffiutai namminersortunut, assingusunik neqerooruteqareersunut unammillertunik ingerlatsinnginnissaat imaluunniit ingerlatseqqusaannginnissaat nalinginnaasumik tunngaviussanersoq isummerfigissallugu pissusissamisuusaaq.
- Periarfissaq sorleq Arctic Umiaq Linemit aamma Namminersorlutik Oqartussanit allaffissornikkut ingerlateqqinneqassasoq kissaatigineqarpa?

Periarfissani assigiinngitsuni Arctic Umiaq Linep nassuaatigisaanni kingunissanik takutitsisinnaalluni, angallassinermut ataatsimut ilusiliaq pisariaqartinneqarpoq.

Arctic Umiaq Linep suliamik nangitsinermini atorsinnaasaanik, aningaasaliinissanut tunngavissisinnaallutik naatsorsuusiornissat amigaatigineqarput. Taassumap kingunerisaanik, massakkut aningaasaliissutaasinnaasut annertuumik aarlerinartumik nassataqassapput.

Mittarfittaassat takornarissat amerlassusaannut sunniutissaat ilisimaneqalerpata, taakkunungalu kisitsisitigut paasissutissat Siuariartornissamut Ineriartornissamullu misissueqqissaarnermi ilaatinneqalerpata, taakkunanga ilaatigut naatsorsuusiortoqarsinnaassaaq.

Iluaqutissat, ajoqutissallu oqimaaqatigiissinneqarsinnaallutik assigiinngitsunik periarfissiilluni politikikkut sulineq tunngavississallugu, nassuaatip matumap siunertaraa.

Ilaasunik angallassinерup ineriartortinneqarnissaanik politikikkut anguniakkat naammassisinnaaqqullugit, politikikkut siunnerfissaq qulaajarneqartariaqarpoq. Siunnerfiup taassumap qulaajarneqarnissaanut apeqqutit pingasut, eqqartueqqinnermi ilaatinneqarsinnaasut suliarineqarput.

Ilannussat

- Ilannussaq 1 – Aallarniutaasumik aningaasaliineq
- Ilannussaq 2 – Naatsorsuutigisamik kaaviiartitassat
- Ilannussaq 3 – Arctic Umiac Line A/S-imut periarfissat tallimat
- Ilannussaq 4 – Arctic Umiac Line A/S-imut 2024-mi angalanissamut pilersaarut
- Ilannussaq 5 - Air Greenlandip angallavii



Ilannugsaq 1 – Aallarniutaasumik Aningaasaliineq

Periarfissaq	A – Arctic Umiag Line A/S atorunnaarsitsineq	B – Ingerlatsiinnarneq*	C - Sarfaq Ilttuk nutaaq	D – Nutarsaaneq
	DKK 0	DKK ?	DKK 250- 350 mio.	DKK 400- 600 mio.
Aningaasaliissutinit piusinnaaneranut ilimagisaq				
	Ukiut 0-it	Ukiut 3-5-it	Ukiut 30-t	Ukiut 30-t
Ataavartumik aserfallatsaaliineq, ingerlatsineq, aallarniutaasumillu aningaasaliissutinit aningaasaliineq				
Periarfissaq	A – Arctic Umiag Line A/S atorunnaarsitsineq	B – Ingerlatsiinnarneq*	C - Sarfaq Ilttuk nutaaq	D – Nutarsaaneq
Ukiog 1	-	67,84 mio.	155,32 mio.	185,20 mio.
Ukiut 2-t	-	70,56 mio.	111,15 mio.	152,44 mio.
Ukiut 3-t	-	71,36 mio.	113,14 mio.	154,83 mio.
Ukiut 4-t	-	72,96 mio.	115,24 mio.	157,31 mio.
Ukiut 5-it	-	74,69 mio.	117,45 mio.	167,50 mio.
Ukiut 6-it	-	-	119,78 mio.	162,18 mio.
Ukiut 7-it	-	-	122,24 mio.	165,12 mio.
Ukiut 8-t	-	-	124,84 mio.	168,25 mio.
Ukiut 9-t	-	-	127,60 mio.	171,60 mio.
Ukiut 10-t	-	-	130,54 mio.	185,55 mio.
Ukiut 11-t	-	-	133,66 mio.	178,85 mio.
Ukiut 12-it	-	-	136,99 mio.	182,90 mio.
Ukiut 13-it	-	-	140,55 mio.	187,75 mio.
Ukiut 14-it	-	-	144,37 mio.	193,10 mio.
Ukiut 15-it	-	-	148,49 mio.	211,87 mio.
Ukiut 16-it	-	-	150,87 mio.	180,50 mio.
Ukiut 17-it	-	-	96,37 mio.	123,46 mio.
Ukiut 18-it	-	-	98,45 mio.	123,30 mio.
Ukiut 19-it	-	-	100,59 mio.	129,18 mio.
Ukiut 20-t	-	-	102,79 mio.	139,29 mio.
Ukiut 21-t	-	-	105,07 mio.	135,44 mio.
Ukiut 22-t	-	-	107,43 mio.	135,84 mio.
Ukiut 23-t	-	-	109,86 mio.	142,29 mio.
Ukiut 24-t	-	-	112,37 mio.	143,0 mio.
Ukiut 25-t	-	-	114,96 mio.	159,78 mio.
Ukiut 26-t	-	-	117,64 mio.	150,84 mio.
Ukiut 27-t	-	-	120,40 mio.	157,99 mio.
Ukiut 28-t	-	-	123,25 mio.	159,42 mio.
Ukiut 29-t	-	-	126,20 mio.	166,97 mio.
Ukiut 30-t	-	-	129,25 mio.	178,82 mio.



Ilanngussaq 2 – Naatsorsuutigisamik kaaviiartitassat

Periarfissaq	A – Arctic Umiag Line A/S atorunnaarsitsineq	B – Ingerlatsiinnarneq*	C - Sarfaq Ittuk nutaaq	D – Nutarsaaneq
Ukiog 1	-	56,02 mio.	45,27 mio.	81,48 mio.
Ukiut 2-t	-	56,44 mio.	45,81 mio.	90,92 mio.
Ukiut 3-t	-	56,87 mio.	46,36 mio.	94,98 mio.
Ukiut 4-t	-	57,31 mio.	46,93 mio.	99,15 mio.
Ukiut 5-it	-	57,74 mio.	47,50 mio.	107,73 mio.
Ukiut 6-it	-	-	48,08 mio.	109,73 mio.
Ukiut 7-it	-	-	48,68 mio.	111,79 mio.
Ukiut 8-t	-	-	49,28 mio.	113,89 mio.
Ukiut 9-t	-	-	49,90 mio.	116,03 mio.
Ukiut 10-t	-	-	50,52 mio.	118,22 mio.
Ukiut 11-t	-	-	51,16 mio.	120,47 mio.
Ukiut 12-it	-	-	51,75 mio.	122,76 mio.
Ukiut 13-it	-	-	52,35 mio.	125,10 mio.
Ukiut 14-it	-	-	52,96 mio.	127,50 mio.
Ukiut 15-it	-	-	53,58 mio.	129,95 mio.
Ukiut 16-it	-	-	54,21 mio.	132,46 mio.
Ukiut 17-it	-	-	55,05 mio.	134,82 mio.
Ukiut 18-it	-	-	55,90 mio.	137,23 mio.
Ukiut 19-it	-	-	56,78 mio.	139,69 mio.
Ukiut 20-t	-	-	57,67 mio.	142,20 mio.
Ukiut 21-t	-	-	58,59 mio.	144,77 mio.
Ukiut 22-t	-	-	59,50 mio.	147,37 mio.
Ukiut 23-t	-	-	60,42 mio.	150,03 mio.
Ukiut 24-t	-	-	61,37 mio.	152,75 mio.
Ukiut 25-t	-	-	62,34 mio.	155,53 mio.
Ukiut 26-t	-	-	63,56 mio.	158,35 mio.
Ukiut 27-t	-	-	64,82 mio.	161,23 mio.
Ukiut 28-t	-	-	66,11 mio.	164,17 mio.
Ukiut 29-t	-	-	67,43 mio.	167,18 mio.
Ukiut 30-t	-	-	68,79 mio.	170,24 mio.



Ilanngussaq 3 - Arctic Umiaq Line A/S-imut periarfissat tallimat

Arctic Umiaq Line A/S-ip Ilulissat aamma Qaqortup akornanni angallassisarluni pingaarnertut angalanissamut pilersaarutini, Upernaviup aamma Nanortaliup akornannut annertusiniarlugu sulissutigaa. Angalanissamut pilersaarut najukkami pingaartumik A-mit B-mut naatsumik angalasunut, takornarissanullu pingaartumik najukkanik misigisassarsiorlutik takisuumik angalasunut pilerinassaaq.

Nanortaliup aamma Upernaviup akornanni inoqarfiit 49-pput. Taakkunannga inoqarfinit 49-sunit Sarfaq Ittuup 2024-p aasaani nunami ullunut 14-inut pilersaarummini tikittagai 18-iupput, ukiullu siuliini aasaanerani ullunut arfineq-marlungut pilersaarummini aqqanillit tikittarlugit.

Eqqissisimaarnissamik aalajangersakkat, umiarsuullu killilimmik angissusaa patsisaallutik, Sarfaq Ittuk ulloq-unnuarlu tikittarluni angalasinnaangilaq. Umiarsuaq anginerugaluaruni, paarlakaattumik unnukkut aamma unnuakut sulisoqartarluni ulloq-unnuarlu tikittarluni angalasoqarsinnaassagaluarpoq.

Taamatut ingerlatseriaaseq, Kalaallit Nunaanni sinersortaammik suli piviusunngortinneqarani nunat tamalaat akornanni nalinginnaasumik ingerlatseriaasiuvoq.

Umiarsuaq nutaaliaq, tinutitittarfimmi misissorneqartariaqarnissaata tungaanut, ukiut tallimakkaarlugit ukioq kaajallallugu niuernermik tunngavilimmik angallassisinnaassasoq naatsorsuutigineqarpoq. Taamaanneratigut ukiuunerani sinersortaammik angalanerit nalinginnaasunngortinneqarsinnaassapput. Taamaattoq Sarfaq Ittuup qammatit pingajuat avillugu ukiuoorumik misissorneqartarneratigut, ukiuunerani nalinginnaasumik ingerlatsisinnaangilaq.

Arctic Umiaq Line A/S-ip aamma Ineqarnermut Attaveqaasersuutinullu Naalakkersuisoqarfiup kiisalu Aningaasaqarnermut Akileraartarnermullu Naalakkersuisoqarfiup akornanni ataavartumik oqaloqatigiittarneq tunuliaqutaralugu, sulissutigeeqqissallugit ilippanaateqarnerusunik Arctic Umiaq Line A/S tallimanik periarfissiorpoq.

Tulliuttumi periarfissat toqqartorneqarput, 2025-llu kingorna imaatigut ilaasunik angallassinissami periarfissat pillugit Inatsisartut apeqqutigisaannut akissutissiisoqineqarlutik. Periarfissat taakkua tallimanik kategoreqarput:

- 1) uninneq,
- 2) ingerlaannarneq,
- 3) nutarsaaneq,
- 4) ineriartortitsineq, nutarsaanerlu aamma
- 5) aningaasaliinissamut periarfissaq (attartorneq).

Periarfissat taakkua, periarfissanik tamanik annerusumik matussusiipput. Periarfissat assigiinngitsut periarfissani sammineqarput, ilutigisaanillu piviusuusinnaasumullu naleqqutumik, attuumassuteqartumillu ersersitsisumik missingersuutini kisitsisitigut missiliuutinik suliaqarsinnaanermut ersarillutik.

- Periarfissaq **A**: Arctic Umiaq Line A/S-imik atorunnaarsitsineq.
- Periarfissaq **B**: Arctic Umiaq Line A/S-imik allannguutitaqanngitsumik ingerlatsineq.
- Periarfissaq **C**: Arctic Umiaq Line A/S-imik 1:1-imik nutaangorsaaneq.
- Periarfissaq **D**: Arctic Umiaq Line A/S-imik ineriartortitsinermut, nutarsaanermullu atatillugu umiarsuarmut nutaamut aningaasaliineq.
- Periarfissaq **E**: Arctic Umiaq Line A/S-ip Ineriartortinneqartinnagu umiarsuarmik piusumik sivisuumik attartorneq.

Periarfissaq A: Arctic Umiaq Line A/S-imik atorunnaarsitsineq

Arctic Umiaq Line A/S attaveqaasersuutitut pisariaqartutut isigineqanngippat, Arctic Umiaq Line A/S-ip matuneqarluinnarnissaa Periarfissaq A-p qulakkiissavaa. Umiarsuaq nutaangilisooq patsisaalluni, Arctic Umiaq A/S-ip

anigaasartuutigisartagaasa unitsinneqarnissaat atorunnaarsitsinissami siunertaavoq. Taamaattoqassappat ingerlatseqatigiiffik isumaliutigilluakkamik, pilersaarusiukkamillu atorunnaarsinneqassaaq. Tulliuttumi kisitsisit tamarmik, Arctic Umiaq Line A/S-ip missiliuussarai.

Periarfissaq A-mut takussutissiaq

Aningaasaliissutit: 0 kr.
Kiffartuussinissamut
isumaqatigiissut: ukiumut 8-15 mio. koruunit.
Piffissaq ingerlatsiviusoq: 2024 – 2025

Arctic Umiaq Line A/S-ip matuneqarluinnarnissaanik qulakkeerilluni periarfissaq taanna toqqarneqassappat, tamanna arlalitsigut kinguneqassaaq. Arctic Umiaq Line A/S-imik ingerlatsinermi anigaasartuutit, allaffissornikkullu nukiiit atorneqartariaqartatut atorunnaarsinneqarnissaat periarfissami tassani siunertaavoq.

- Ilaasorpasuaqarsinnaalluni unnuinertaqarluni nunami angalariaaseq tatiginartoq, akikinnerusorlu matussaaq.
- Nunap immikkoortortaanni angallasserit, ilaasoqarpallaarsinnaanngitsunit (soorlu umiatsianik mikinerusunik, qulimiguulinnik imaluunniit Dash-8-nik) taamaallaat pisinnaassaaq.
- Sineriak sinerlugu inoqarfinnik tulleriarilluni tulattarluni angallasseriaaseq atorunnaassaaq, A-mit B-mullu angalariaaseq aalajangiisuulissalluni.
- Nunami takornarialerineq kisiartaalluni kalaallini periarfissanngussaaq.
- Suliffeqarfiit minnerpaamik 50-it annaaneqassapput.
- Nanortaliup aamma Upernaviup akornanni anigaasat 50 mio. koruunit missaanni isertinneqartatut annaaneqassapput.
- Silarlutsillugu inoqarfiit akornanni angallassissutit allat tamarmik aallarsinnaassanngillat.
- Immikkut pisoqartillugu, pinartoqavitsillugulu unnuisoqarsinnaajunnaassaaq.

Periarfissaq B: Arctic Umiaq Line A/S-imik allannguutitaqanngitsumik ingerlatsineq

Periarfissami tassani Namminersorlutik Oqartussat Sarfaq Ittuk piginnarusuppaat. Assigiinngitsutigit pisinnaalluni tassangaannartumik uneriatarnermik kinguneqarlutik ajorluinnartumik pisinnaasut, Periarfissaq B-mi sillimaffiqeqarput. Tassunga tunngatillugu aarlerinarneruleluttuinnartut annikillisinniarlugit, kiffartuussinissamik isumaqatigiissut annertuserujussuassaaq. Kiffartuussinissamik isumaqatigiissut annertuserujussuaqqallugu, Periarfissaq B qularnanngitsumik 2029-p tungaanut ingerlasinnaassaaq, taassumallu kingorna Arctic Umiaq Line A/S-ip Periarfissaq A imaluunniit Periarfissaq B imaluunniit C/D/E qinertariaqalissallugu. Tulliuttumi kisitsisit tamarmik, Arctic Umiaq Line A/S-ip missiliuussarai.

Periarfissaq B-mut takussutissiaq

Aningaasaliissutit: Tinutittarfimmi 20 mio. koruunit, 2026
Kiffartuussinissamut
isumaqatigiissut: ukiumut 15 mio. koruunit
Piffissaq ingerlatsiviusoq: 2025 – 2029

Arctic Umiaq Line A/S-imik allannguutitaqanngitsumik ingerlatsissagaanni, ullumikkut umiarsuaq pigisaq (Sarfaq Ittuk) piginnarneqartariaqarpoq, "pingaarnertullu periusissiaq" attatiinnarneqarluni. Aarlerinarsinnaasut annikillisinneqarnissaat, ingerlatsinerullu allanngortinneqarnissaanut pisariaqartitat, tassungalu atasumik anigaasaqarnermut aamma anigaasaliissutinut sunniutaasa annikillisinneqarnissaat, ilusiliami tassani siunertaavoq.

Periarfissap taassumap qanoq sivisutigisumik atasinnaanissaani, ingerlatsinermit qanoq sapiissuteqartigerussuseqarnissaq apequtaassaaq. Periarfissap taassumap qanoq sivisutiginiissaa, nalinginnaasumik sivikissangatinneqartariaqarpoq. Sarfaq Ittummi aqutsisut aamma Royal Arctic Line A/S-imi ingerlatsinermit immikkoortortaqarfiup nalilerpaat, 2029 ilanngullugu Sarfaq Ittuk illersorneqarsinnaasumik angallassissutigineqarsinnaassasoq. Tamanna pisinnaaqullugu aserfallatsaaliineq, atortunillu taarsersuisariaqarnermut aningaasaliissutigineqartariaqartut aningaasaliissutigineqassapput. Taamatut periaaseqarnermi kingunissai pingaarnertut tassaassapput:

- Aserfallatsaaliinissami kinguaattooruteqareernej patsisaalluni, piffissap ingerlanerani aningaasartuuteqarneruleriartorneq.
- Ingerlatsinermit isumannaassutsip aarlerinarsigaluttuinnarnera.
- Ingerlatsinerup ineriartortinneqarnissaanut periarfissakinneq, taamaalillunilu aningaasartuutiviit matussuserneqarnissaanut periarfissakinneq.
- Umiarsuup unitsivinneqarnissaata aarlerinarsigaluttuinnarnera.

Periarfissaq C: Arctic Umiag Line A/S-imi 1:1-imi nutaanngorsaaneq

Umiag Line A/S attaveqaasersuutitut pisariaqartutut isigineqarpat, Sarfaq Ittuttut ipajaartumik 70 meterit missaannik takitigisumik, unnuami ingerlatsinngitsumik, takornarissanullu inissaqartitsinnginnerusumik, talinnganermilu inoqarfinnut unnuiffissatut periarfissaqanngitsumik, umiarsuarmik nutaamik pissarsinikkut ingerlatseqatigiiffimmik nutaanngorsaaneq Periarfissaq C-p qulakkiissavaa. Tulliuttumi kisitsisit tamarmik, Arctic Umiag Line A/S-ip missiliuussarai.

Periarfissaq C-mut takussutissiaq

Aningaasaliissutit: 350-450 mio. koruunit
Kiffartuussinissamut
isumaqatigiissut: ukiumut 35 mio. koruunit
Piffissaq ingerlatsiviusoq: 2027 – 2052

Arctic Umiag Line A/S-imi 1:1-imi nutaanngorsaaneq periarfissaq atussagaanni, Sarfaq Ittuttut angitigipajaartumik nutaamik umiarsuarsisoqartariaqarpoq. Ullumikkutut ingerlatsinerup ingerlatiinnarinnissaq aqqiissummi tassani tunngaviusoq, kisianni ingerlatsinermit aningaasartuutissat siunissamut ungasissumut ilisimaneqarlutik, ingerlatsinermilu aarlerinarsinnaasut annikinnerullutik nutaaliaanerusequmik, ingerlatsinermilu isumannaanerusequmik umiarsuarmik pissarsilluni.

Ilusiliami tassani pingaarnertut unammillernartussat tassaapput:

- Ingerlatsineq annertusineqarsinnaanngilaq, angalasartullu amerlisinneqarsinnaanatik (soorlu periarfissaq A).
- Pilersaarummik ineriartortsinermit atatillugu tulliuttut patsisaallutik aarlerinarsinnaasut, annertuumillu aningaasartuutissat
 - Piffissaq missingersuusiorfiusoq.
 - Piffissaq ilusilersuiffiusoq.
 - Piffissaq pisiffiusoq, isumaqatigiissusiorfiusorlu.
 - Piffissaq sanaartorfiusoq.
 - Piffissaq inaarutaasumik piareersaasiorfiusoq.

Piffissat tamarmik kukkusumik naliliiffigineqarsinnaapput, malitsigisaanillu kinguneqarsinnaallutik.

Periarfissaq D: Arctic Umiag Line A/S-imi ineriartortitsineq, nutarsaaneq

100+ meterit missaannik takitigisumik, unnuami ingerlatsisumik, takornarissanullu inissaqartitsinerusequmik, talinnganermilu inoqarfinnut unnuiffissatut periarfissaqartitsisumik umiarsuarmik nutaamik pissarsinikkut, alliliinissamut ingerlatseqatigiiffimmi nutaanngorsaaneq Periarfissaq D-p qulakkiissavaa. Tulliuttumi kisitsisit tamarmik, Arctic Umiag Line A/S-ip missiliuussarai.

Periarfissaq D-mut takussutissiaq

Aningaasaliissutit: 450-550 mio. koruunit
Kiffartuussinissamut
isumaqatigiissut: Ukiumut 45 mio. koruunit, ineriartortitsineq
apeqqutaalluni 0 koruuninngoriartuaartitsineq
Piffissaq ingerlatsiviusoq: 2027 – 2052

Arctic Umiaq Line A/S ineriartortinneqarlunilu nutarsarneqassasoq siunnersuutigineqarluni periarfissami tassani, Sarfaq Ittuup ingerlatsineranik tigusinikkut imaluunniit Sarfaq Ittuup ingerlatsineranik taartissatut nutaamik umiarsuarsiqaartuussaana aallaavigineqarpoq. Periarfissami tassani Namminersorlutik Oqartussat umiarsuarmik piginnittussaqqippoq.

Ilusiliami tassani unammillernarnerpaasussat ilaatigut tassaassapput (kisianni imaangitsaq taakkununga killiligaasoq):

- Aallarniutaasumik annertuumik aningaasaliineq.
- Angalassinissamik najukkami, nunarsuarmilu neqerooruteqartalernissamik suliniut.
- Kalaallit Nunaannut atatillugu takornarissatigut anguniarfissaq ilisimaneqanngilaq.

Taamaakkaluortoq nutaamik umiarsuartaanikkut atorluarneqartussamik assigiinngitsunik periarfissaqarpoq:

- Angalasut atuerussuseqarnerusut amerlanerusut ingerlatsineranut aningaasalersueqataassapput.
- Ornitassamik mikinerusunik, immikkuullarissunillu ilanngussinissaq periarfissaalluni ulloq-unnuarlu ingerlatsineq.
- Umiarsuaq ukiumut ulluni 365-ini angalasinnaassaaq, tinutittarfimmiinnera minillugu.
- Taamaallaat ukiut tallimakkaarlugit tinutittarfimmiittassaaq.
- Sarfaq Ittumut sanilliullugu imarsionermi ilaasunut tamanut sunniuteqartumik annertuumik kivitsineq.
- Najukkameersumut, takornarissamullu inissaqarnerulersinnaaneq.
- Nunami tamarmi sumiiffinnut amerlanerusunut, avinngarusimanerusunullu tikittalerneq.
- Najukkami innuttaasunut umiarsuarmi atugassarititaasut.
- Siunertamut sinaakkutinik naleqqussaaneq.
- Unnuisarfiit eqqunngikkaluarlugit nunami takornarialerineranut sunniuteqarneruneq.
- Umiarsuarnut takornariartaatinut ilaallutik Kalaallit Nunaanni takornarissanit 76.744-isunit (Kalaallit Nunaanni naatsorsueqqissaartarfimmit kisitsisit 2023-meersut) niuernerme iluanaaruteqaqataaneq.
- Najoqqutassiaq uppersarsagaq, tak. Hurtigruten aamma Havila Norgep sineriaani.
- Nunami takornarialerinerme periusissiamut toqqaannartumik tunngavissiineq.

Periarfissami tassani iluaqutissat annerpaasussat ilaat tassaapput:

- Umiarsuaq pissarsiarineqartussaasusaaq angalanngikkuni, sanaartorneqanngikkuni imaluunniit ilusileriigaanngikkuni pioreerpoq.
- Piffissaq ilusilersuiffiususaaq pisariaarutissaaq, tamannalu aalajangiinnermit iliuuseqarnissamut piffissaq annikinnerujussuussalluni.

Piffissaq sanaartorfiususaaq tamakkiisumik imaluunniit annersaa pisariaarutissaaq, tamassumalu aarlerinarsinnaasumik ingerlatsinissap annikinnerujussuunissaa qulakkiissallugu.

Periarfissaq E: Arctic Umiaq Line A/S-ip Ineriartortinneqartinnagu umiarsuarmik piusumik sivisuumik attartorneq

Ineriartortitsinissami suliap piffissaqarnissaa, tunngaviusumillu misilittagaqarnissaq Periarfissaq E-p qulakkiissavaa. Ilutigisaanik 100 meterit missaannik takitigisumik umiarsuaqarluni attaveqaasersuummik Namminersorlutik Oqartussat nakkutilliinissaannut, sunniutaanillu naliliinissaannut piffissaqassaaq. Umiarsuarmut nutaamut aningaasaliinissaaq, Periarfissaq E-p kinguartissavaa. Periarfissaq D-mi kiffartuussinissamik isumaqatigiissutigut pisariaqartitsinertut, periarfissaq manna pisariaqartitsivoq.

Periarfissaq E

Aningaasaliissutissatut
missiliuussat: 0 kr.
Kiffartuussinissamut
isumaqatigiissutissamut
missiliuussat: Ukiumut 45 mio. koruunit
Piffissaq ingerlatsivissatut
missiliuussaq: 2026 – 2031/35

Nutaamik umiarsuarsitinnani typitut, angissutsitullu kissaatigisaaq malillugu ukiut tallimat, qulillu akornanni umiarsuarmik attartorneq, tamanut iluaqutaasussamik arlalinnik iluaqutitaqassaaq. Tamaat, piffissarlu ungasissoq isigigaanni tassani ajoqutissat ikitsunnguupput. Taamaakkaluartoq periarfissami tassani, piumasaqaatit kissaatigineqartut malillugit piginnittup attartorsinnaasaanik umiarsuarmik naleqquttumik, atorsinnaasumillu nassaarniarnissaaq unammillernarsinnaassaaq. Taamaakkaluartoq nutaamik umiarsuartaarnemi atorluarneqartussanik periarfissaqarpoq. Periarfissaq D-mi periarfissat annerusumik assingisa saniatigut, erseqqissarneqarsinnaasut tassaapput:

- Ingerlatsinermi ilusiliaq, ingerlatsinerlu pituttorsimanikkut kingunissai minnerpaaffimmiittussanngorlugit aallartisarneq, imaluunniit akornani piffissaq.
- Ilinniartitsineq, ilinniarnerlu ingerlakkiartuarlugit sulisoqarnikkut ikaarsarneq.

Periarfissami tassani iluaqutissat annerpaat ilaat tassaapput:

- Aallarniutaasumik aingaasaliissutissat annikitsut.
- Umiarsuarmik nutaamik pisineq aarlerinangitsooq.
- Misilittagaqalernissamut, ingerlatsinerullu ingeriartortinneqarnissaanut atugassarititaasut pitsaasut.
- Umiarsuarmut nutaamut kissaatit pillugit qularuteqanngilluinarneq.
- Pisariaqartitsineq malillugu ilusiliap piffissaliussaani sivitsuisinnaaneq.

Sanaartornissaaq nukingernarani kinguartinneqassaaq, tamassumaluu aarlerinarsinnaasumik ingerlatsinissap annikinnerujussuunissaa qulakkiissallugu.

Arctic Umiaq Line A/S-ip innersuussutaa

Arctic Umiaq Line A/S-imi aqutsisut, periarfissat tulliuuttut tulleriinnilerlugit innersuussutigaat. Arctic Umiaq Line A/S attaveqaasersuutitut pisariaqavissutut isigineqarnissaa kiisalu Namminersorlutik Oqartussat aningaasaleerusussuseqarnissaat, ullutsinnullu naleqquttumik kiffartuussinissamik isumaqatigiissusiornissamik neqerooruteqarnissaat tunngavigalugit tulleriinnilerneqarput. Tulleriinnilersuineq imaappoq: Siullermik periarfissaq B aallartissaaq (allannguutitaqanngitsumik ingerlatsineq). Taassumap kingorna periarfissaq E (umiarsuarmik piusumik sivisuumik attartorneq) nangillugu sulissutigineqassaaq. Periarfissaq E aallartinneqareerpat, umiarsuarlu attartugaq angalalereerpat periarfissaq C (Arctic Umiaq Line A/S-imik 1:1-imik nutaannorsaaaneq) imaluunniit D (Arctic Umiaq Line A/S-imik ineriartortitsineq, nutarsaanerlu) aallartinneqarsinnaalissapput. Periarfissaq C imaluunniit D tamakkiisumik pilersinneqareerpata, periarfissaq E unitsinneqassaaq. Taamaattumik pisussaaq ima issaaq:

Ingiaqatigiissitsilluni tulleriiarineq, Arctic Umiaq Line A/S naapertorlugu ima issinnaavoq:

Periarfissaq B aallartissaaq

- 2024: Arctic Umiag Line A/S umiarsuarmik piusumik sivisuumik attartugassamik nassaassaaq
 - Sikusiutaasinnaanissaaanut + innarfissanullu aningaasaliinissamut ilimanarluinnartoq
 - Sivisuumik attartornissaaq pillugu isumaqatigiissusiortoqassaaq, ulloq-unnuarlu angallassinissamut pilersaarut nutaaq, tuniniaanerlu ammarneqassaaq

Periarfissaq E aallartissaaq

- 2025: Arctic Umiag Line A/S-ip piunasaqaatai naammassiumallugit umiarsuaq nutarterneqassaaq
- 2025: Arctic Umiag Line A/S-ip inuttani, sulisunilu amerlissavai
- 2026: Umiarsuup attartukkap, 2026-mi qaammatit pingasukkaat siulliani Sarfaq Ittuk paarlassavaa

Periarfissaq B naammassissaaq

- Sarfaq Ittuk unnuiffissatut/umiarsuartut attartukkatut atulissaaq
- Aasaanerani Sarfaq Ittuk umiarsuartut appaatut ikiuutissaaq
- Sarfaq Ittuk tuniniarneqassanersoq, tuniniarneqassannginnersorluunniit pillugiu inassuteqaat
- 2028: Attartornermi misilittakkat pillugit sineriat sinerlugu imaatigut ilaasunik angallassineq pillugu nassuiaat nutaaq
- 2029: nassuiaatip, taassumallu oqaluuserineqareernerani, periarfissaq D-mik (imaluunniit C-mik) aallartitsineq
- 2030: Umiarsuarmik nutaamik pisinissaaq aallartisarneqassaaq

Periarfissaq D/C aallartissaaq

- 2032: Umiarsuup nutaap, 2032-mi qaammatit pingasukkaat siulliani umiarsuaq attartugaaq paarlassavaa

Periarfissaq E naammassissaaq

- 2037: 1/3 Ukiut tallimat qaangiunnerini misissuineq, kiffartuussinissamik isumaqatigiissummik annikilliliineq
- 2042: 2/3 Ukiut tallimat qaangiunnerini misissuineq, kiffartuussinissamik isumaqatigiissummik annikilliliineq
- 2047: 3/3 Ukiut tallimat qaangiunnerini misissuineq, kiffartuussinissamik isumaqatigiissut atorunnaassaaq
 - Umiarsuarmut aningaasaliineq naammassineqassaaq, umiarsuarlu imminut napatittumik ingerlalerluni
 - Umiarsuaq annertuumik aserfallatsaalineqarnissaata tungaanut, 2062-ip tungaanut angallassissasoq naatsorsuutigineqarpoq

AUL Angalanissamut pilersaarut: 1. Juni, 2024 - 19. Oktober, 2024 (sap. ak. 20-t = kaajallaanerit 10-t)

A/K	Ornitaq	Tikiffik	PT	Aallarfik	Uilloq	CN
↓	Nuuk (Misissugassanik misissuineq)	08:00	09:00	17:00	Arfininngorneq	0
↓	Nuuk Full Fjord System (Takusassarsiorneq)				Sapaat	1
↓	Nuuk	18:00	03:00	21:00	Sapaat	1
↓	Qeqertarsuatsiaat	06:00	00:15	06:15	Ataasinngorneq	2
↓	Paamiut	14:00	01:30	15:30	Ataasinngorneq	2
↓	Arsuk	23:00	00:15	23:15	Ataasinngorneq	2
↓	Narsaq	08:00	01:30	09:30	Marlunngorneq	3
↓	Qaqortoq	11:30	02:30	14:00	Marlunngorneq	3
↷	Nanortalik	20:00	03:00	23:00	Marlunngorneq	3
↑	Qaqortoq	07:00	03:00	10:00	Pingasunngorneq	4
↑	Narsaq	12:00	03:30	15:30	Pingasunngorneq	4
↑	Qaqortoq	17:30	03:30	21:00	Pingasunngorneq	4
↑	Arsuk	06:00	00:15	06:15	Sisamannngorneq	5
↑	Paamiut	13:00	01:30	14:30	Sisamannngorneq	5
↑	Qeqertarsuatsiaat	22:15	00:15	22:30	Sisamannngorneq	5
↑	Nuuk (Misissugassanik misissuineq)	07:30	13:30	21:00	Tallimannngorneq	6
↑	Maniitsoq	07:00	03:30	10:30	Arfininngorneq	7
↑	Kangaamiut	14:00	00:15	14:15	Arfininngorneq	7
↑	Itilleq	19:15	00:15	19:30	Arfininngorneq	7
↑	Sisimiut	22:00			Arfininngorneq	7
↑	Sisimiut			10:30	Sapaat	8
↑	Attu	16:30	00:15	16:45	Sapaat	8
↑	Kangaatsiaq	19:15	00:15	19:30	Sapaat	8
↑	Aasiaat	23:00	00:30	23:30	Sapaat	8
↑	Ilulissat	06:30	03:00	09:30	Ataasinngorneq	9
↑	Qeqertarsuaq	14:30	00:30	15:00	Ataasinngorneq	9
↑	Ilulissat	20:00	01:00	21:00	Ataasinngorneq	9
↷	Uummannaq	13:00	06:00	19:00	Marlunngorneq	10
↓	Ilulissat	11:00	09:15	20:15	Pingasunngorneq	11
↓	Qasigiannuit	22:30	00:30	23:00	Pingasunngorneq	11

↓	Qeqertarsuaq	07:00	03:30	10:30	Sisamangorneq	12
↓	Aasiaat	14:00	02:30	16:30	Sisamangorneq	12
↓	Kangaatsiaq	20:00	00:15	20:15	Sisamangorneq	12
↓	Attu	22:45	00:15	23:00	Sisamangorneq	12
↓	Sisimiut	06:30	03:30	10:00	Tallimangorneq	13
↓	Itilleq	12:30	00:15	12:45	Tallimangorneq	13
↓	Kangaamiut	17:45	00:15	18:00	Tallimangorneq	13
↓	Maniitsoq	21:30	01:00	22:30	Tallimangorneq	13
↓	Nuuk (Misissugassanik misissuineq)	07:30	09:30	17:00	Arfininngorneq	14




air greenland

Timmisartuussinermi aqqutit (januaari – marsi) 2024

Rutenetværk (januar – marts) 2024


Route network (January – March) 2024





air greenland

Timmisartuussinermi aqqutit (juuni – oktobari) 2024 Rutenetværk (juni – oktober) 2024 Route network (June – October) 2024





air greenland

Timmisartuussinermi aqqutit (novemberi) 2024

Rutenetværk (november) 2024

Route network (november) 2024

